

觀象居易傳箋

觀象居易傳箋卷第九

三三隨風巽君子以申命行事。風相繼而爲隨。隨乃澤雷之象。巽倒兌與震旁通。何取乎隨。蓋風乃剛之所爲。而柔隨以散。與隨取剛來之義正同。惟隨故無所不被者。亦無所不入。巽主命令。君子法隨風之義。命之而又申之事。以命而行。申則事在必行。命原於天。卦之陽也。事爲乎民。卦之陰也。申則自上巽天道之陽。而伸其義於下。四陽有其次第也。行則極下巽地道之陰。而通其情於上。二陰該乎遠近也。中互兌離。所布告者。凡皆悅服人心。而使人明知其意。故申既著其當行之理。而行卽踐其所申之言。申得乾施。行得坤順也。

初六進退利武人之貞

進退志疑也。利武人之貞。志治也。巽爲進退。六爻所同。若初則但有可進更無可退。何獨以進退歸之。初猶未入互體陰間。則無離

之明陰柔則無兌之決剛柔各有其志剛之志未能即行則柔之志亦未能即順故欲進仍退而不勝其疑所以治其疑者心之明不可強而志之決有可勉合巽離兌而武人之象見焉則四是也互離戈兵互兌悅以犯難武人有爲大君之志柔順乎剛者貞也利即象之兩利以四之巽治初之巽而巽疑去矣履之武人曰志剛巽之武人曰志治志剛即武人之貞所謂志治乃爲初而言耳九二巽在牀下用史巫紛若吉无咎

紛若之吉得中也陽必居陽陰必居陰舊解專以此釋經疑未盡當然不可謂易無此義也於何見之於巽之二上俱象巽在牀下見之巽取陽入於陰三五皆當陽位惟二上以陽居陰故其入於陰者先已與柔同順而失剛巽之用其吉凶之異則以二近而中上遠而過耳巽爲木兩剛橫列於上一柔分承於下牀之象也下即指初牀下至爲卑暗一言巽而已在牀之下則不可謂之剛巽

矣。二幸得中能以其中者爲命之始申。史掌卜筮。巫掌祓禳。禮王前巫而後史。兌爲巫。兌象夫。書契故又爲史。紛紛若若。風之橈物似之用者。二以得中爲五用。重巽之道也。所以用二者在兌於此。已見用庚之義矣。史巫以口舌爲用。初之志疑。非此不行。吉在得中。故無咎也。

九二頻巽吝

頻巽之吝。志窮也。三之重剛同於五。而象頻巽者。頻巽與重巽不同。重巽若風之相繼。前後同一義也。頻巽則有顧此失彼之患。凡衆剛之志俱在巽柔。獨三承外柔。其於初固以相隔而未盡入之力。於四乃以相承而若有比之私。失其剛巽之志。而巽道窮矣。頻巽蓋在得失離合之間也。三與上皆窮。而三僅爲吝者。志窮乃志疑之所致。而上窮又志窮之所致。疑不治則吝。吝不憂乃凶耳。

六四悔亡田獲三品

田獲三品有功也。四與初皆陰，宜皆有悔。然巽以外卦爲得位，順五之剛，往而利見，其志無疑，故悔亡。互離兌，乃武人之象。初利武人，而四已載績武功，離爲佃漁，陰坤爲田，陰主受，故爲獲三品者。上次下三品也。上殺中心，次殺中髀，胈下殺中腸，汚泡三品以死之速者爲上，遲者爲下。心則離也，髀髀則巽也，腸汚泡則兌也。先宗廟，次賓客，次充君庖，尊神敬客，所謂功也。五多功，四之功，因順剛而有者也。

九五貞吉，悔亡，无不利，无初有終。先庚三日，後庚三日，吉。

九五之吉，位正中也。五之中與二同，二不在貴位，而五位正中，貞者正也。離兌皆得坤貞，其吉卽卦之亨也。四以順五而悔亡，則五之悔亡必矣。五爲順從者所利見，則五之無不利又可必矣。但巽乃小亨，非若乾元之始而亨也。其小以巽之故，則必以其正中者治巽而使之大，然後可以言吉。無元則無初矣，得貞則有終矣。而

吉所出致義不盡此蓋巽不治則巽將變而為蠱蠱之與巽異者在五之一爻命乙屬木離火為木所生巽風又自火出所以治巽者不在此惟兌金與乾同屬十干始命終癸而中更於庚庚者金也蠱用命以造事巽用庚以行權巽時本非壞極但取斷決無事取新既不用命是無初也庚已過中脩弊舉廢是有終也丁丙乙乃先乎庚者辛壬癸乃後乎庚者後庚之三日即先命之三日於蠱為終則有始者於巽為無初有終先庚所以申命由巽而起未離乎陰也後庚所以行事至艮而終已成乎陽也象兩言吉傳專言九五之吉慎乃出令非五之中正不能也

上九巽在牀下喪其資斧貞凶

巽在牀下上窮也喪其資斧正乎凶也五四為牀上處其上以陽居陰又過其中中正兩失象雖與二同而二即牀也故猶能為五用有紛若之吉上本出牀之上而乃入牀之下卑巽之極并不得

如頻巽之吝也。巽近利有資。上以無位喪之。兌金加巽木。有斧。上以倒兌。喪之。三窮於志。其志因近四而窮。上當巽四而不能行其志於四。則志無可言。直以處上而窮耳。夫用巽道於巽之時。二與上皆正道也。二之用史巫。卽用其在牀下之道。故不必言貞而特著其吉。上之喪資斧。實由於在牀下之故。故雖貞而亦凶也。

三三麗澤。兌君子以朋友講習。兌以壅坎而爲澤。水土交厝。水之

鍾也。凡水自發源。其水可直稱某水。澤乃衆水下流所匯。若禹貢

之九澤。爾雅之十藪。職方氏九州之藪澤。所從來非一。澤固以相

麗而成。而卦之重兌。則又如燕之九澤。楚之七澤。近而相比。兌重

則中互離。巽其悅以麗而入。是爲麗澤。兌又爲口。君子兼法其義

於朋友之講習。五倫之中。乾君坤臣。純陽純陰也。乾震坎艮爲父

子兄弟。皆陽卦也。咸恒夫婦之道。陰陽之合也。朋友宜取諸陽卦。

而朋友主信。信固屬陰。兌以悅而兼麗。互相滋益。斯有當於朋友

之交講取兩口講而不習則徒講矣。離爲飛鳥巽爲白凡鳥飛水上望之其羽皆白是合離巽而有習之義也。既有學而時習之悅又有朋來遠方之樂兌悅莫要於此矣。

初九和兌吉。

和兌之吉行未疑也。卦惟兩陰二五承之四則乘之其不比於陰者獨初九耳。陰則乖陽則和陽和者春氣也喜怒哀樂皆以中節爲和兌近喜樂而喜尤得悅之正和兌乃得喜氣以行故吉也。傳曰行未疑者初本乾之震又震爲行疑乃巽象爻進至三方互巽故傳於初曰未疑於二曰信卦亦獨此二爻爲吉未涉互巽故也。九二孚兌吉悔亡。

孚兌之吉信志也。初至五連體中孚而孚象獨見於二五者信存於中惟爲陰所乘其剛中必於孚乃見也。然五已互巽不如二互離明故二爲孚兌孚已在兌也比巽則不免志疑而有悔矣。離德

光明故雖不能無疑者其行而有可信者其志吉矣而又曰悔亡其吉固不如初也

六三來兌凶

來兌之凶位不當也。純卦無往來可言而兌三曰來兌此非若震之震來也蓋卽坎三來之坎坎之意二介兩兌間體兼離巽既麗且入惟以容悅爲事故上引而去而三乃感而來外卦之兌若三有以來之以一陰處上下四陽之中陽皆君子則小人不安其位必欲致上之來此所謂位不當也而其凶亦直爲來兌之凶矣

九四商兌未寧介疾有喜

九四之喜有慶也。四入外體比三互巽有疑莫決兌口相向其象商兌書曰我商賚汝是也坎爲不寧四亦墮坎者外有事於商則中必有所未寧此正理欲所由判也巽風生疾兩間謂之介其疾由於比陰介則以三四別體地有分限而介然守之憂悔吝者存

乎介喜以憂致得悅道之正故傳更稱其有慶見其喜不止爲一身之疾愈也其疾以商而生其喜以介而得傳於內卦曰和兌之吉孚兌之吉來兌之凶至四直曰九四之喜蓋惟九四必有是疾亦惟九四能有是慶疾在巽入慶在離明也

九五孚于剝有厲

孚于剝位正當也

五孚與二同五互巽疑本兌也而有剝象兌體

象夬剝與夬反何名爲剝蓋柔之剝剛由姤而始互巽象姤乃剝之機兌義本取決柔自兩兌相麗乃有柔遇剛之象四猶離體尙以商而致疾五但互巽豈得不以剝警乎然五之孚卽有著於剝者旣孚矣又自厲焉厲者悅之反有厲者本未有厲也惟五剛中乃能有之傳稱其位正當正者正秋也秋終戌月於卦當剝正秋未及於剝也因其近而有厲巽當辰巳之月夬決爲乾卽繫於此五之有厲其卽夬象孚號有厲之義乎按履五曰夬履兌五曰孚

于剝。前賢所論未及取象之義。蓋悅言乎兌。間乎役坤。戰乾之中。剝消乾。夬消坤。乾坤夾兌於西。則由坤至乾。惟兌之用爲最大。此一陰消長之所關也。凡下五爻連體中孚者。惟兌與履。履上得陽。陽極於上。進乎夬而後乾值月。履上所以元吉也。兌上得陰。陰極於上。進乎剝而後坤值月。兌上所以未光也。兩卦之主皆以剛中互巽。故特揭夬剝以明用兌之道。雜卦傳始乾終夬。猶此意也。

上六引兌

上六引兌未光也。上處兌終。由三之悅於內者。而又加長焉。離絲巽繩於象爲引。引從弓。開弓引滿也。坎爲弓。坎實其下。弓乃張矣。離矢接於巽繩。引而欲發。引兌宜凶而不凶者。三之來兌。惟以悅爲事。上已在外。猶冀其能利貞也。夫陽止於外。其象爲敦。陰現於外。其象爲引。愈敦則愈厚。故艮積厚而流光。愈引則愈薄。故兌外飾而中喪。處悅之道。惟危乃光。兌與艮旁通。光者艮象。悅至盈滿。

未有不自得意者。故傳以未光惕之。

凡純卦兩體相同。而必有一爻爲得位而主其卦者。如乾坎之五。艮之上。巽之四。皆在外卦者也。坤離之二。震之初。皆在內卦者也。其非得位者。若乾坎之二。坤離之五。得中者亦多美詞。震四巽初。以不得中。而其詞不同於卦主。惟艮兌爲陽卦陰卦之終。艮不取三。而取上。敦艮亦爲吉占。至於兌則在內。在外皆無可取。不獨純卦然也。兌在內者八。而位不當者有其六。中兌兌也。即損節之三。一八行三則疑也。不節之嗟。又誰咎也。亦未爲美也。兌在外者八。惟困之動悔。革之豹變。爲有吉占。然困必有悔。革必居貞。乃吉。革又先曰征凶。其他若大過。夬皆凶。隨之上窮。咸之口說。萃之未安上。與此之未光。皆非美也。艮由兌主悅物。故無適而可以兌爲。小人之象。豈爲過哉。

三三風行水上。渙先王以享于帝。立廟。風散萬物。何獨於水爲渙哉。水由地中行。或疑水非風所能散矣。顧無風則靜。有風則動。不

但。瀾。漪。之。成。文。章。彭。湃。之。決。隄。岸。也。觀。夫。水。懷。腹。堅。東。風。起。而。立。解。人。見。風。行。於。水。之。上。而。不。知。風。實。行。於。水。之。中。風。以。散。之。於。水。尤。著。卦。義。在。散。而。傳。義。則。在。聚。享。帝。以。教。民。事。君。立。廟。以。教。民。事。親。否。乾。之。天。道。兩。陽。不。易。是。帝。也。廟。乃。艮。象。震。主。器。於。廟。中。爲。亨。巽。震。坎。艮。之。木。爲。立。於。郊。則。升。離。陰。於。天。道。之。下。尊。祖。以。配。天。也。於。廟。則。來。震。陽。於。艮。門。之。內。假。廟。以。主。祭。也。享。帝。享。親。皆。以。誠。意。感。格。則。坎。之。通。達。也。反。其。本。乃。所。以。合。其。散。歟。

初六用拯馬壯吉

初六之吉順也。水待風渙而初處最下渙所難及故爻獨初不言渙初在坎宮義當用拯在初則於拯亦易拯用乾剛之馬初於坎爲馬薄蹄承二又爲美脊互震善鳴馬斯壯矣六居初則能順以承之初得用六之道拯在二而吉歸於初故傳曰初六之吉也。

九二渙奔其机悔亡

渙奔其机得願也。渙由剛來故二始言渙互震故奔卦由二之在而成非謂既成渙而又欲奔也。剛乘柔爲机亦猶巽艮之爲牀巽以兩陽乘一陰艮以一陽乘兩陰則此之一陽一陰象宜爲机矣。二在否四互艮巽故机爲其机艮手憑之雖奔險宜若有悔而悔以奔机而亡安危固有判也。二用在動然居不安者不能動剛之不窮者以得机爲基傳曰得願願以震動而見天心也。

六三渙其躬无悔

渙其躬志在外也。三處坎上風之散水三先被之互艮爲身進乎三卽巽矣乾坤往來在二四三當人位故三獨稱躬三本坤體震坎艮皆陽卦則躬已渙矣人莫患乎有已之私三志在天下匪躬之故故傳曰志在外外卽得位乎外之外三與四之上同者同志也。二已悔亡三直無悔在外乃志在用世故此與泰初彙征其義同也。

六四。渙其羣。元吉。渙有邱。匪夷所思。

渙其羣。元吉。光大也。四來自坤。初三爲四之羣。四入乾體。心在上。同。渙其羣也。凡巽四俱爲得位。而此更得坤之中氣。故繫以元吉。其所以渙。卽其所以聚也。四上同五。艮山爲邱。邱者聚也。凡水皆平。水有邱。則不平。有者爲五有也。夷者平也。等夷之人。卽羣之謂。風能散水。而不能散水上之邱。故曰匪夷所思。坎艮皆主心。思水之平。而風能散之。此夷所思也。有邱焉。而散者自聚。此匪夷所思也。有山之材。照以天光。故傳言光大。艮道光明。而坤以大終。大其特立。無私也。兩言渙者。渙其羣人之渙也。離乎坤。以散爲渙也。渙有邱。水之渙也。進乎乾。以聚爲渙也。然必先渙其羣。而後能渙有邱。則有邱乃渙羣之實耳。

九五。渙汗其大號。渙王居。无咎。

王居无咎。正位也。卦用在二。而五居尊。以應。故彖舉全象。以二爲

王。文明時位。以五爲王。王者出令者也。巽爲號。令出惟行。弗惟反出而不反。莫如汗矣。五本否乾之坎。爻互艮。象身坎下。流於身爲汗。二行君令而致之民。其象渙汗。乾陽稱大。五之申命。皆其大者。命出於上。曰渙汗。令行於下。曰號。渙司馬相如文云。言傳號渙。萬里奔走。是也。號令從王心以出。艮止其所爲居。說命惟厥攸居。論語居敬。居簡。居之無倦。皆此居也。王之居心。人不可得見於其號令。見之。大命旣申。王則恭己正南面而已矣。四得吉而五僅無咎者。立達之願。堯舜猶病。無咎蓋難言矣。傳言正位。卽鼎之正位。疑命。正君心以正朝廷。艮有思。不出位之義也。

上九。渙其血。去逖出。无咎。

渙其血。遠害也。坎爲血。卦上去坎最遠。而以血言者。重坎之卦。判於上之一爻。否乾本伏坎。自四二易而坎以巽散。血在人身。周行不滯。是之謂渙。非血渙於外也。下言去逖出。乃指其害乎血者。亦

非去血。逃血出血也。去卽謂其伏坎之隱也。逃卽謂其遠於內坎也。出卽謂其出乎中爻也。剋坎者土否坎成坎獨有艮土而上已過互艮始於去漸及於逃而終歸於出血與汗皆出於身而血必傷而後見巽之入似以傷爲咎者故傳言害而巽乃倒兌固無毀折而但見散以去壅也。爻曰去逃出傳則曰遠遠但逃之一義蓋其去與出無非遠之而已上於三陽獨在卦外卦所謂假廟涉川者上無與焉處換之終當風之末風定波息與水相忘雖曰無功亦豈有咎與

三澤上有水節君子以制數度議德行 坎壅爲兌通塞異焉顧澤無水之困其理易明澤上有水之節其義未顯蓋坎兌皆水者概言之耳若分觀之陽爲水陰爲岸水在中而岸在旁坎之象橫象也水在下而岸在上兌之象豎象也壅坎非以陽爲岸也水之填坎下者先填而及其溢則後至者先溢澤爲水之所鍾歸於澤

者不得行。溢於澤者亦不能止。其分有定。所以爲節也。君子節以制度。而度必有數。坎兌之水。其淺深離合無定。是有數焉。將法其以兌節坎者。而爲之制。親親之殺。尊賢之等。必先有以議之。德者心之所得。行者身之所行。震見天心。艮象人身。震行艮止。德行之象。坎爲律。所以制之。兌爲口。所以議之。制由議定。則坎惟心亨。而兌悅以和爲貴矣。

初九不出戶庭无咎

不出戶庭知通塞也。節之與重坎異者。在初之壅坎。當節之初。知節而能塞者也。乾坤皆稱戶。凡室內有戶。外有門。其中有庭。兌西當酉。闔戶之時。初在內而數奇。有戶象矣。不出戶。則猶未至於庭也。坎爲智。坎壅似若無知。而有咎者。然坎水之下注。先積於下。知塞而塞。是卽所以爲通之基也。坎通兌塞。節以三五往來而成。故初二兩爻不言節。其象皆不出。而無咎與凶判焉。動靜異宜也。

九二不出門庭凶

不出門庭凶失時極也。解此爻者多以二爲知塞而不知通。然二果以節爲戒。則三在二上。何以有不節之嗟。竊觀內卦當節者。初也不節者。三也。二介兩爻之中。互震而動。澤動則泛溢。二至上體屯。難生雷雨。滿盈懼其中德之失。而不能節也。震東當卯。門將闢矣。互艮在上。爲門。二猶未及於門。是不出也。顧二承三。三已互艮。雖不出而已。及於庭。二當中爻。乃庭象。震爲大塗。門旣闢。特不出耳。不出門。卽不出庭矣。不出而已凶者。震動故也。傳言極者。極之爲言中也。時極猶云時中。失時極。卽失中也。二猶當節之始。何遽同於苦節乎。易於二多以征凶爲戒。此亦其義也。

六三不節若則嗟若无咎

不節之嗟。又誰咎也。節由三成。而三有不節之嗟。何也。三處兌終。澤已盈矣。卦惟三四兩陰相比。當兌坎之缺。震動方中。滿而將溢。

故曰不節若。若之云者。雖上承坎。未出兌體。將溢而猶未溢也。三爲悅主。而象嗟者。嗟悅相反。兌互艮故也。三本泰坤之離父。其心明於事理。兌口交坎。憂其象嗟。若心口相度而自咎也。能嗟其不節。則可以補過而無咎。猶之臨三曰既憂之無咎也。傳曰又誰咎。正嘉其能自咎也。

六四安節亨

安節之亨。承上道也。兌壅於初。則坎通於四矣。中正以通者在五。四非中也。然嘗觀水之上流。或細而涓滴。或大而潰沸。其發源之處不安也。水之下流。或散而胡蘇。或聚而激蕩。其歸宿之處不安也。坎水注兌。四在水澤之交。適當中流。順承於五。在坎當剛柔相際。有承流宣化之義。是曰安節。坎通則亨。亨不在五而在四者。五之通於四。乃見也。承上曰道者。水以導爲道。故稱水道也。

九五甘節吉往有尙

甘節之吉居位中也。甘者苦之反。水寒則苦。通則甘。甘得味之中。書曰稼穡作甘。記曰甘受和是也。五互艮山出泉。坎五泉列艮連互震。又有土爻稼穡之義。當位以節。故甘中正以通。故節。蓋由泰三往居於五。而所居之位得其中也。往有尚。卽坎之行有尚。悅以行險。由五之往而有之。不傷財。不害民。斯卽五之所尚者耳。

上六苦節。貞凶悔亡。

苦節貞凶。其道窮也。三處兌終。上處坎終。兌主受。至終則溢。坎主施。至終則竭。上本泰坤之兌爻。與三同體。兌在卦外。於地爲鹵。故其味苦。坎體本坤。四已見亨。五爲乾索。故不言利。而上之坤貞不改。處上之時。有不得不苦節者。此貞也。其道變而非常。苦乃炎上火象。坎與離反。有凶道矣。悔自凶而趨吉。上何能并悔亦亡。蓋節雖苦。苦實節也。貞者正也。亦固也。傳曰其道窮者。正釋其悔亡之義。非以窮釋凶也。君子固窮。窮然後見君子。

三三澤上有風中孚君子以議獄緩死 澤氣上升風氣下被感於無形而動於不自知其異乎渙者坎水動則水隨風而行兌澤靜則風因澤而入風爲散亦爲入於遇坎兌而義各著焉君子見夫離虛其中象似圍土釋名曰築其表牆其形圍也中孚兼畫之離乃獄之大者古者死刑待秋乃決兌正秋也兌金剋巽木爲死易以大過爲死象大過上下易則爲中孚內兌外巽巽亦倒兌兌亦倒巽議兼人我兌口相對而議之獄之爲言所以實確入之情僞議者議緩也巽不果爲緩兩巽陰在人道慎重民命於死但緩耳非盡不死也獄成而孚輸而孚而死者與我兩無憾焉矣大象於刑獄多尙離明離合震爲噬嗑豐離合艮爲賁旅中孚以大離而中互震艮動止兩形于是議以兌緩以巽聖人忠厚惻怛之意莫昭著於此矣

初九虞吉有他不燕

初九虞吉志未變也。虞者憂之反。繫辭傳憂虞之象是也。李善注羽類賦虞與古

通兌悅爲虞下三爻所同何獨以初當之傳特推其故曰志未變

也。孚言心故稱志。志以震動而見初未入互震故雖體乾之震爻而志未變。初念純一不雜吉之道也。卦用在兩陰陽以陰爲他燕者燕飲也。兌口爲悅爲澤燕卽虞之意耳。四倒兌故不燕有他猶云有應應在四而四不與燕飲之列正以見初志之未變也。

九二鳴鶴在陰其子和之我有好爵吾與爾靡之

其子和之中心願也。二五皆剛中五爲卦主故爻獨五言有孚二在內卦乃不願乎外者然其中德未有感而不應者也。兼畫之離象飛鳥震得生氣爲雀雀霜降則鳴雄鳴上風雌鳴下風兌當正秋震爲善鳴雀性好陰兌西陰地二在兩陰之下鳴於山澤之間則與鳴于九臯者異矣。震長子有父道艮小子爲其子巽反爲兌兩口相向爲和其和之意若何爵乃飲器之形象爵者考工記

梓人爲飲器。獻以爵而酬以觚。卦象外實黃流在中。飲器也。大離爲鳥。器象爵也。剛中故稱好爵。離謂繫戀。異繩象也。二至五互頤。故象樂飲。我吾二自謂也。爾指艮陰脩天爵。而人爵從之。此二句卽其鳴之意也。傳獨云其子和者。言子則父可知。言和則倡可知。若有鳴無和。無以見彼此之願。願由中心以出。貴其中也。

六三得敵。或鼓或罷。或泣或歌。或鼓或罷。位不當也。三當風澤相激。陰又遇陰。兩主交。相當爲敵。敵則孚之反也。孚在中。何以敵乎。傳明其故曰。位不當也。以一封言。則兩陰遇而相孚。以六爻言。則四位以承五能順從。三位以乘二不退從。兌現巽伏。性不相得。故或之。澤之無聲。風蕩之鳴。震雷爲鼓。艮止則罷。離目當兌口之缺。艮手掩之。泣之象也。兌悅出口。互震有聲。震爲笑。言歌之象也。兌於五行屬水。又屬金。水生木。金克木。兩象並見。泣歌亦有罷時。傳舉鼓罷固已該之也。

六四月幾望馬匹亡无咎

馬匹亡絕類上也。卦象離日而四以月爲義。月受日光陰根陽也。易於兌在下者。每以月幾望取象。小畜歸妹是也。月生明於西。必由西過南以至東。而其光始滿。兌互震震爻終於四。離光未盡。且下四爻互歸妹。而三當歸妹月幾望之爻。三有抗陽之勢。四惡其非類而欲絕之。兩陰稱類。巽兌別體爲絕。月幾望乃三之象。而於四言之者。蓋明四所以馬匹亡之故。傳故於月幾望無所釋也。凡易言月幾望皆是陰敵於陽。而此則取從陽之義。三四皆互震爲馬。兩陰則兩馬也。四從五必舍三。馬亡其一不成匹矣。三視四爲敵之得。四視三爲匹之亡。四不孚三似當有咎。而得主喪朋能絕類以上同於五。故無咎也。

九五有孚攣如无咎

有孚攣如位正當也。二五皆爲卦主。二在兌體不若五之得位而

中正則孚乃化邦。惟五克當之。中孚之爻有六。而能孚者獨五。有之也。合上下內外。一以誠信相孚。其象變如變之文。從絲從手。巽繩執以艮手。變如象也。五當有豚魚之吉。而僅無咎者。王道不計功利。亦惟立於無過之地而已。

上九翰音登于天。貞凶。

翰音登于天。何可長也。上與初同爲無位。初以在內而吉。上則以在外而凶。巽其究爲躁卦。有將變爲小過之象焉。巽爲雞。雞鳴必先動翮。故名曰翰音。巽上爲羽儀。翰也。巽風有聲。音也。日未出震雞已先鳴。司晨應時。是亦信也。翰音登天。有二義焉。雞無登於天者。天謂天位。巽爲木。爲高。上當木末。雞鳴樹顛之象。此一義也。音聞於空。凡空處皆天也。登謂其音非謂其翰。詩霍鳴於九皋。聲聞於天。高則擬之於天。此又一義也。北地之雞多畜高處。或須射而取之。則登固未爲失常道。但卦取義於鳥之抱卵處高而鳴。豈抱

卯之時與地哉。霍在陰而翰音顧在天。貞非其貞。故凶。登於天。不可謂之應乎天也。傳曰。何可久。非料之也。正勉之也。

三三山上有雷。小過。君子以行過乎恭。喪過乎哀。用過乎儉。易以陽爲大。陰爲小。乃巽兌皆陰卦。而謂之大過。艮震皆陽卦。而謂之小過。此其過不在卦而在爻。大過之過中四陽也。故初無咎。而上不可咎。小過之過上下四陰也。故三四皆曰弗過。皆觀山之高峻。雷雨時在其中間。殷其雷。在山之陽與側。凡人躋山頂而聞雷鳴於下。其常也。雷及於山之上。是特山下之人見以爲在上耳。且艮爲山。亦爲小石。山之高峻者少。而不高峻者爲多。則山上之雷。乃指尋常之山較之大壯之在天上。氣象不同。故其過爲小也。夫山上之雷。非卽天上之雷歟。自地觀之。則地以上皆天。自山觀之。則雷以越山爲過。雷之過因山而見其過也。惟山爲尋常之山。故君子於末俗之弊。亦但就人人之恒行而用其可以過者。如行之當。

恭喪之當哀用之當儉是矣。艮爲身震爲行艮反亦震也。中互大過爲棺槨。二五守以人道是臨喪也。萬物成艮卽出震其用不竭所以用也。坎爲勞卦兼畫則過恭加憂則過哀卦義可小不可大故過儉此論語盡禮爲諂及與易寧戚與不遜寧固之道也。

初六飛鳥以凶

飛鳥以凶不可如何也。初處最下象所謂宜下者莫初若矣。四陰爲鳥翼初與上則翼之翰也。鳥之飛必兩翼齊舉上震動於上而初亦反艮爲震象鳥之飛飛則凶矣其凶以飛之故其飛以上之故是則初之凶乃上以之故傳特推原之曰不可如何以見初之徇外有不能自主者也。

六二過其祖遇其妣不及其君遇其臣无咎

不及其君臣不可過也。震艮本皆坤體兩剛皆自乾來乾坤父母也以爻位言三爲父四爲祖五柔居尊則妣也自祖母以上通謂

之妣。妣當在祖之上。如同人祖后稷。而以其母姜嫄爲妣。故詩云。似續妣祖。周禮大司樂享先妣。在享先祖之前。二應在五。是過祖而遇妣也。春秋傳曰。我所欲曰及。不期而會曰遇。巽初象姤。故曰遇。言祖則父在其中。故廟曰祖廟。及者附決之象。陽卦以陽爲君。兩遇字無二義。遇臣卽遇妣。臣道與妻道相同。二遇五而越三四。是亦過其君也。不曰過而曰不及者。凡人處事失中。過不及通爲過。失臣不可過其君。故曰不及。又五爲君位。宜當陽剛。而乃以六居五。蓋祖之象顯。而君之象隱。卦無九居尊者。是不及也。去陽從陰。惟其宜順故耳。無過不及之謂中。二以柔中應五。而有過不及。是有咎矣。然二之過不及。乃正所以合於中者。故無咎也。

九三弗過防之從或戕之凶

從或戕之凶何如也。卦之過不在陽剛。故三四皆爲弗過。三四皆剛失位而不中。下卦之中在二。二以應五而過三四。三四弗過也。

艮止爲防。三於初上之飛。卽當以其弗過者爲防之道。三與四比。四爲動主。互巽不果。止不終止。將從四以妄動。二乘四。故稱從也。陽困陰中。兼畫之坎象。寇盜戕之象也。界乎動止。故言或凶。由於從其凶。乃其自取。初累於上。初之凶。不可如何也。三動於四。三之凶。何如也。傳若爲問之之詞。以警之也。

九四无咎。弗過遇之。往厲必戒。勿用永貞。

弗過遇之。位不當也。往厲必戒。終不可長也。上卦之中位在五。四

亦失位不中。彖所謂不宜上者。當在四。而四獨無咎。何也。中互巽兌。三從四。則失艮止之德。兼有進退毀折之凶。四乘三。則體雖震動。其動由卑。巽悅豫以出。所以無咎也。動必有所遇。二過三四。而進遇五。是過而柔與柔遇也。四因三之上。從而退遇三。是弗過而剛與剛遇也。遇亦姤象。不可大事之時。雖有遇而不可往。震行爲往。往則驚懼而厲。厲故知戒。巽命兌言。出於艮止爲戒。其戒若何。

戒以勿往而已。乾貞在艮，勿用震動，則用艮止。用六承貞，教其用柔道以處剛也。兩剛皆失位不中，而傳獨於四曰位不當，蓋從者上逆遇者下順，四不當動而處動位，知其不宜之所在，則宜矣。永者長也，不可長者過之貞，則可長之貞，不終過也。

六五密雲不雨，自我西郊。公弋取彼在穴。

密雲不雨，已上也。卦象飛鳥五居尊，不可言鳥，故以雲物之飛揚取象。坎以上爲雲，下爲雨，兼畫之坎，全卦皆雨，而云不雨者，兌澤蒸而成雲，巽風起自地道，巽連震動，雲之飛騰，方興未已，坎雨欲下，遇艮而止，是不雨也。陰但上往而不下順，其不雨之故，自有在我者。兌位西方，文王西伯謂西爲我，陰逆而不下，是有陰無陽也。五居尊稱公，五求巖穴之士，相輔以畜陽，兌苙木爲弧，震竹爲箭，連於巽繩，有弋之象。艮山中空爲穴，五與二應，五稱我，則二稱彼矣。二在艮中，故稱在穴。艮手爲取，不言在穴何物者，六爻總一飛

鳥象也。傳曰：已上者，澤不上，無以成雨。若已上而不雨，上於何極乎？其宜下，不待言矣。

上六弗遇過之，飛鳥離之凶，是謂災眚。

弗遇過之，已亢也。坤上嫌於無陽，六居上，則其不知進退存亡者，有同陽亢在小過，則中爻之過皆有所遇。三四剛遇剛，二五柔遇柔，上但爲初凶而不與初遇，無遇則獨有過之而已。凡鳥之飛，其翼兩分，故上與初同爲鳥翰，而上象弗遇，飛極於巽風之上。若鳥之凌罡風而羽化者，雖與初偕飛，至此有相離之象。小過與中孚對，大坎反爲大離，離有離別之義，其凶必矣。災自外至，離火象也。皆自內生，坎水象也，不曰有災眚，而曰是謂災眚，蓋有者猶未有也。此已災眚，不必更言有矣。且其弗遇過之者，特以爲過耳，豈知是并不可謂過也。是謂災眚也。四曰弗遇過之，上曰弗遇過之，四得三則陽不終困，上失初則陰終不可長，特行之道，究以楊爲主。

也。傳於五曰已上。於上曰已亢。凡皆勉以宜下耳。使任其亢而不雨。而五又何必取彼在穴以相助哉。

三三。水在火上。既濟。君子以思患而豫防之。水不得火。則水失其用。水在火上。所以濟也。既濟乃極盛之時。天下事靡不有初。鮮克有終。上五爻體重坎。坎陷爲患。惟君子用離之明以思之。既思則必預爲之防。初陽在重坎之下。防於卦始。故曰豫之字指泰而言。乾成陰卦。坤成陽卦。君子於泰時。有內陰外陽之患焉。坎離心德。故能思。思卽思夫水之在火上。其勢有不可久者。卦義專重坎陷。蓋濟之云者。本取水爲義。君子有終身之憂。乃無一朝之患。或以水火交濟爲解者。疑未當也。

初九。曳其輪。濡其尾。无咎。

曳其輪。義无咎也。初以離明。未入重坎之體。居卦始而得思患豫防之道。有控制之方焉。坎爲輪。離牛。互坎下。柔爲曳。六爻以上爲

首初爲尾。水性潤下。初在坎下。爲坎所濡。凡獸之涉水。必先揭其尾。旣涉而尾乃垂焉。濡及尾而能無咎者。曳輪則有所藉以行。慎重之至。以義斷之。其濟可必也。

六二婦喪其茀勿逐七日得

七日得以中道也。二自泰與五易而相應。婚媾之象。離女稱婦。五乘坎輿以迎二。二亦可乘互坎之輿以從五矣。爾雅輿革後謂之茀。郭注以韋鞞後曰。疏云韋謂輓也。婦乘翟茀。二居坎底車後也。離爲雉。又爲黃牛之革。翟茀也。坎輿多眚。坎剋離。故喪其茀。二乘得中。其行不苟。以車之無茀而守禮不行。離主禮也。火動而上爲逐。喪特喪其在外者。逐則失其在我者矣。旣濟中互未濟。故有勿逐之戒。得者得茀也。七日者。歷未濟之六爻。則未濟中復互旣濟而爲七日。得與喪皆離象。二在離中。傳故獨於七日得曰以中道。正見其喪非以中道。而其得乃以中道也。彖傳所謂得者。此得也。

九三高宗伐鬼方三年克之小人勿用

三年克之憊也。內卦之終吉之盡而亂將作矣。泰乾爲君商自成湯以後賢聖之君六七作。至於武丁雖爲中興之主已同日昃之離。故三象高宗乾位西北坎位正北又爲隱伏故象鬼方鬼方在北又稱西洛也。三與上應上乃終亂者戰乎乾故稱伐歷坎三爻乃成既濟故爲三年三介重離之中坎水不能勝之則克矣。克者濟也。日中則昃已濟則將趨於衰三內外比陰陰爲小人所當照以離明戒使勿用。凡世之將衰未有不自小人壞之者。君子思患豫防先在弗忘創造之艱難故傳但言克之憊而小人之當戒義可該矣。坎爲勞卦重坎勞勞故曰憊其在學者理欲之辨是亦人鬼之關也。

六四繻有衣袽終日戒

終日戒有所疑也。四入坎互離所處在明闇之間繻者帛邊也坤

爲布帛。四在上下之交。故其爲繻。或有製作而爲衣。亦有殘敝而
成襦。襦者。幣帛之殘。用以拂拭器物者也。乾坤爲衣裳。坎傷離爲
襦。繻有衣襦。猶云卦有小大。辭有險易。云爾。惟或衣或襦。兼有兩
象。是以疑而當戒。四在泰當巽。又巽進退而坎加憂。有戒心焉。互
離爲日。四進於三。過乎日昃而將盡矣。故言終終日戒者。四居坎
坎之中。無時不戒也。傳言有所疑者。有衣有襦。卽其所也。

九五東鄰殺牛不如西鄰之禴祭實受其福

東鄰殺牛不如西鄰之時也。實受其福。吉大來也。泰極將否而旣
濟之後。要必有代興者。時爲之也。大明生於東。月生於西。日月相
對爲鄰。東鄰離日象也。西鄰坎月象也。殺牛者。天子之祭。四時皆
殺牛也。坤爲牛。坎克離爲殺。禴者。夏祭之名。亦取諸離也。諸侯禴
則不禴。禴則不嘗。不得比於天子。二在泰居五君也。五在泰居二
臣也。祭以時爲大。天子之祭。有時不如諸侯之祭者。時有盛衰也。

乾陽爲福。五雖往坤。猶是乾體。故曰其福。乾施坤受。故云受福。傳言吉。卽彖初吉之吉。陽爲實。爲大。故爻曰實受。而傳曰吉大來。豈直小者亨而已。

上六濡其首厲

濡其首厲。何可久也。上在重離之外。明止於五。上爲卦終。終以亂矣。上無離明之用。則但覺坎水之盈。上交爲首。首乃元首之義。在上者宴安沈溺。濡及於首。此終之所以亂。而上能以坎憂爲厲。厲則道窮者不致終窮。故傳曰何可久。非謂濡首之必亡。正謂首之不可長濡也。蓋厲卽泰五其亡之心。所謂安不忘危也。

三三火在水上未濟君子以慎辨物居方卦不曰不濟而曰未濟

蓋既濟未濟。由泰否之二五相易而成。而泰之轉否。否之轉泰。繫於是焉。火在水上之象。日自經。天水自行。地在人則心。火處上。腎水處下。所謂離上而坎下也。未濟所以終濟也。萬物皆天地所生。

而方則物之所在。火爲陽物。水爲陰物。火位南方。水位北方。相逮者在乎辨。不相射者在乎居。君子慎辨其物。使之羣分。慎居其方。使之類聚。物各有類。故分。方自爲羣。故聚。類似分而實聚。羣似聚而實分。有分有聚。則有攻取。而吉凶由此判焉。卦畫剛柔相間。則分。剛柔相應。則聚。辨者分也。居者聚也。慎因坎陷。必先用其離明。既濟思於始。未濟慎於終。而其用則皆以柔中爲主也。

初六濡其尾吝

濡其尾亦不知極也。初居坎始。乃小狐也。與既濟之初。剛柔用異。而濡尾象同。傳以不知極釋之者。極訓中。亦訓終。而有終又由於得中也。卦之三陰。五得中而亨。二互離而利。是失中道者。惟初獨耳。初無攸利。故吝。事始卽吝。何能續終乎。其不續終之故。乃由於不知極。離明爲知。初未入互離。故不知。傳曰亦者。蒙既濟上六之文。濡尾似勝於濡首。而柔之失中則同也。

九二凶其輪貞吉

九二貞吉中以行正也。一為坎主坎固為輪離牛互坎有曳象曳輪道在用離故與濟初同象但濟初乃已濟者此則方謀所以濟故以貞為貴二得乾中所謂離上坎下者貞下起元於二是賴貞者正也曳輪將以有行而所以行其正者惟中以行之故初無利而二貞初吝而二吉以二居重離之始也

六三未濟征凶利涉大川

未濟征凶位不當也。未濟之得中者在五未出中者在初三以一爻介在坎坎之間故以未濟之名專歸之與既濟之三以克為濟其義同也卦內二與四五皆言貞二獨不言貞者卦之所謂未濟至此而終過此則趨於盛矣三於爻位至為危險故不但卦名歸之而傳直以全卦之不當位者並舉而屬之位不當故以征凶為戒既征凶而又利涉大川者未二即既四既四通乎既濟當有終

日之戒。未三終乎未濟。宜用大川之涉。重坎之謂。大川涉。用離舟。未濟中互既濟。涉卽所謂濟也。卦之未濟無攸利。而爻之未濟乃利涉者。未濟之上四爻。下四爻皆互未濟。而以未濟獨言於六三。言未則已趨於盛也。若既濟之上下四爻亦皆互既濟。而九三不言既濟。言既則已懼其衰也。盛世易有亂邦之小人。而衰世難得濟川之君子也。

九四貞吉悔亡。震用伐鬼方。三年有賞于大國。

貞吉悔亡。志行也。二五以中稱貞吉。四在中行之位。過乎未濟之爻。介重離之交。雖未及五之無悔。而悔已能亡。蓋未四卽既三。故伐鬼方之象亦同。鬼方指初。卽既濟之上也。獨言震用者。四本否乾之震。爻震卽蠱。用命之義。用者用九也。既濟之三在泰互震。而不言震者。既濟則鬼方已克之象。未濟則鬼方始伐之象。未濟所以傾否。惟震有復之義。又震無咎者存乎悔。悔亡固由於能悔也。

三年亦謂歷坎三爻也。不言克則此爲未克以前之三年。在未濟言未濟也。坤土爲國。乾陽稱大。震象建侯。古者天子用兵必命方伯連帥。五自否坤而往。易陽爲陰。陰主利。故有賞。方伐猶未有功。而賞不信。則民不勸。是以三年之間。賞勢斷。旅者不絕。戰克則功歸於君。方事則勞屬於臣。故旣濟稱高宗而未濟僅言有賞。賞者君賞臣也。成功患在志滿。故旣濟戒在小人。始事貴在志堅。故未濟賞在大國。傳於方伐而信其志之行。行在震用而震用又由於貞也。

六五貞吉。无悔。君子之光。有孚吉。

君子之光。其暉吉也。五柔得中。得中故貞。亨故吉也。五進於四。四已悔亡。五直無悔矣。乾成離。是爲大明。離火外光。君子指三陽也。五爲乾陽所麗。坎離合則月受日光而繼照。故五有孚於三陽。兩言吉者。貞之吉在於已。有孚之吉被於人也。爻言光。傳言暉者。周

禮十輝注謂日旁之光氣。蓋光雖屬陽。然陽不麗陰。光無由顯。三陽之光。卽六五之光。其暉者。其有孚也。其有孚者。其貞也。光特柔中之外。著爲暉者。而五之吉。遂以暉而見矣。

上九有孚于飲酒。无咎。濡其首。有孚失是。

飲酒濡首。亦不知節也。三陽獨上。與五同。其有孚。孚及於上。未濟者。濟矣。顧上何以有孚於飲酒也。鬼方旣克。上當歸而飲。至之時。坎酒離腹。飲之象也。孚信。徵於譙樂。飲亦何咎。雖然。有節焉。節取象於水澤。故濟卦言節。節又止義。上當否。乾之艮爻。而卦畫陰陽相間。有類竹節卦用。震震爲竹也。不言於旣濟者。旣濟柔乘剛。未濟剛乘柔。剛閑於外。乃真節也。上據重坎。坎溢則濡。上爻爲首。水本潤下。而乃溢上者。酒非能濡人。人自濡於酒耳。再言有孚者。濡首之歡。亦徵孚信。而其先無咎。其後失是在人。卽未歸咎在我。豈可自是失其是。則卽於非矣。初曰亦不知極。上曰亦不知節。皆蒙

既濟之濡首濡尾而言兩爻俱在中爻之外又若互言之也
八卦終於艮六十四卦終於未濟之離三百八十四爻終於未濟
之上九聖人於上九發明知節之義節者艮也知者離也所以知
節者乾以易知也艮止而非止艮之終萬物始萬物也乾二見龍
利見以內乾伏離小過既濟未濟皆貴柔得中乾之大明終始也
乾之艮爻以無咎始未濟之艮爻以無咎終易之懼以終始其要
無咎也

觀象右易傳箋卷第九

觀象居易傳箋卷第十

繫辭傳上

於卦爻繫之辭者文王周公也孔子既就其辭釋之又總括其意以成此傳辭多故分上下漢之馬荀吳之虞姚五代之劉周諸儒迄宋朱子於傳上或分十三二十一章傳下或分十二章九章竊觀韓氏注李氏集解俱不分章蓋傳於一篇之中先後相承一意相生乃專爲繫辭而作故全篇於聖人之辭三致意焉今但仍上下篇之舊固不須移易經文也

天尊地卑乾坤定矣卑高以陳貴賤位矣動靜有常剛柔斷矣方以類聚物以羣分吉凶生矣在天成象在地成形變化見矣此言易之不易也上言天地卑高動靜方物象形者天地自然之理也下言乾坤貴賤剛柔吉凶變化者易書也天包乎地不徒高也以位言則有卑者而高者乃貴故尊卑卑高互言之類聚羣分解在未

濟象傳天不可階但懸其象地有可接直舉其形天象地形莫不有卑高動靜分聚焉知來者逆故易之爲言象也

是故剛柔相摩八卦相盪鼓之以雷霆潤之以風雨日月運行一寒一暑此言易之交易也摩以畫言盪以卦言摩合之而盪分之也

雷霆風雨寒暑皆日月之所爲天地寄用於坎離震即電也雷音電音雷雨多在暑時風雨多在寒時蓋寒暑所包

者廣而長兌在其中矣

乾道成男坤道成女乾知大始坤作成物此言交易以不易爲本也成男成女物已成矣知始作成則其所以然之故也陽卦陰卦其成皆索自乾坤一氣之動則自有知覺一氣既感則自能營作成女亦由於乾故乾爲大始然非坤不能成也

乾以易知坤以簡能易則易知簡則易從易知則有親易從則有功有親則可久有功則可大可久則賢人之德可大則賢人之業易簡

而天下之理得矣。天下之理得而成位乎其中矣。此因交易之本
不易而又推原於易簡也。知卽知大始之知。知大始似難矣。作成
物似繁矣。健故易順故簡。物有力則能勝。事有緒則不擾。一定之
理也。聖人與乾坤合德。法乾坤之易簡者爲賢人。簡由於易業由
於德。在坤爲作爲能。在人爲業。後言大業事業皆根乎此。成位乃
位之貴者。不可以地爲卑。故曰其中也。

聖人設卦觀象繫辭焉而明吉凶。剛柔相推而生變化。此言易之
變易也。陰爻變陽陽爻變陰。有非辭所能盡者。而要不能離乎卦
象。變化由揲著時相推而生。卽辭之吉凶亦因之而變化矣。

是故吉凶者失得之象也。悔吝者憂虞之象也。變化者進退之象也。
剛柔者晝夜之象也。六爻之動三極之道也。得以失見。故先言失。
凶常伏於吉也。虞由憂致。故先言憂。吝常因於悔也。陽變爲進。陽
卦之陰爻亦進也。陰化爲退。陰卦之陽爻亦退也。剛柔所該者廣。

而舉晝夜言者。晝夜尤進退之顯然者也。三才謂之極者。陽極於九。陰極於六。用九用六。必時中。乃合乎道也。

是故君子所居而安者。易之序也。所樂而玩者。爻之辭也。是故君子居則觀其象而玩其辭。動則觀其變而玩其占。是以自天祐之。吉无不利。在上在下。象有序。變亦有序。知其分定。故安心有所得。故樂辭在一卦。占必合兩卦觀之。古無專看本卦動爻之辭而不看之卦者。亦無數爻動而獨看一爻者。象變之體有定。故觀而已明。辭占之用無方。必玩而乃得三極之道。天統乎人。故言天祐而大有上九爻義。則於篇末釋之。

象者。言乎象者也。爻者。言乎變者也。吉凶者。言乎其失得也。悔吝者。言乎其小疵也。无咎者。善補過也。象必連三畫六畫。乃有之。卽一爻之象。亦因他爻乃成也。變則自一爻至六爻。象因變而改。四千九十六卦。皆爻爲之也。疵小未遂爲失。然已過矣。過猶闕陷。補者。

彌縫其闕也。必曰善者。易簡之善。非德之至者。不能知也。

是故列貴賤者存乎位。齊小大者存乎卦。辨吉凶者存乎辭。憂悔吝者存乎介。震无咎者存乎悔。上貴下賤。卦義則一。而爻位各殊。故

曰。列陽大陰。小爻有奇耦。而卦惟陰陽。故曰齊。所以列之齊之辨。之憂之震之者。玩之事也。上言悔吝憂虞之象。此專言憂益虞。乃懷安之意。小疵介乎吉凶之間。不憂則不得也。悔未卽無咎。從而震之。斯過補而悔亡。震者。過勿憚改也。君子平居則樂。臨事則憂。其道一也。

是故卦有大小。辭有險易。辭也者。各指其所之。小大險易。皆有吉凶。不可以小與險爲失。大與易爲得也。小大之內。各有險易。而辭或似險而易。或似易而險。不玩則誤於所之。不能得天下之理。而天命不祐矣。

易與天地準。故能彌綸天地之道。仰以觀於天文。俯以察於地理。是

故知幽明之故。原始反終。故知死生之說。精氣爲物。游魂爲變。是故知鬼神之情狀。天文之精。本於地。地理之氣。秉於天。文與理。其義

一也。然而天不言。理度之有差。精於算者。不能得。而文則可觀。地不言。文身之所處。局於方者。不能窮。而理則可察。文以顯晦而殊。理以遷移而異。是有幽有明也。物莫不自無而有。生之始。有可原也。又自有而無。死而終。有所反也。精之靈曰魄。氣之靈曰魂。合之以成物。魄卽物而具。故精氣散而爲鬼。魂秉物而游。故精氣聚而復爲神。物言其質。變言其靈也。幽明曰故。顯而隱也。死生曰說。隱而顯也。鬼神曰情狀。情隱而狀顯也。何以能知。知其道耳。彌綸由於知。而準又其所以有彌綸之能也。

與天地相似。故不違。知周乎萬物。而道濟天下。故不過。旁行而不流。樂天知命。故不憂。安土敦乎仁。故能愛。相似未卽爲準。蓋其準者。不可見。而其似者。可見。有與天地相似者。而天且弗違。則準矣。凡

其能知故知說知情狀者皆智也。智之爲用周濟旁行而本於樂天知命。不過不流不憂是不違之實也。過則有歉。流則有偏。其違乃由於不相似耳。智之所以濟與行者在仁。仁言土者地之生生由土以見。安在物而敦在心。不敦則不能愛。聖人萬物一體成己之仁。卽成物之智也。

範圍天地之化而不過。曲成萬物而不遺。通乎晝夜之道而知。故神无方而易无體。天地之道不可見於化見之。萬物則化之迹也。於不過見其準。於不遺見其彌綸。幽明死生鬼神約言之。則晝夜其最顯然者。通而知之。又見智以成仁也。神者易之主。易者神之用。有方則神滯於方矣。有體則易窮於體矣。何能範圍而曲成哉。

一陰一陽之謂道。繼之者善也。成之者性也。上言三極之道。天地之道。道何謂哉。卽此晝夜之道。晝夜則一陰一陽而已。善性二句。孔氏正義俱就人之爲學言。朱子本義俱指天之所付言。竊嘗推

究其義。此道天賦於人。而人受之。天人交接。賦受之間。謂之繼。此繼之者。盡人所同。無有不善。孟子性善之說。所從出也。繼善者。天之事。天命之謂性也。顧人受此道。不皆能擴充以盡其量。則不免仁智之偏。更爲氣拘物蔽。而其爲善者已失。惟在有以成之。則由戒慎恐懼。以極於中和位育。要祇完吾性之分量。非有所加也。成性者。人之事。所以率性而脩道也。

仁者見之謂之仁。知者見之謂之知。百姓日用而不知。故君子之道鮮矣。此道仁智皆能見之。然不能通乎晝夜之道而知。故就其所偏。而謂之仁。謂之智。不得謂之見道也。百姓未有能離道以爲日用者。而百姓固不自知也。在天爲一陰一陽之道者。在人爲君子之道。其所以鮮。乃以不能成之之故也。

顯諸仁。藏諸用。鼓萬物而不與聖人同憂。盛德大業至矣哉。善之長爲元。元則仁也。仁顯於用。而用由於無體。故顯而仍藏。憂者。聖

人成之之事也。天地之德業，鼓動於無心，贊其王者，非謂聖人不
及天地正見聖人非憂不能與天地參也。自此以下皆合天道人
事言之。

富有之謂大業，日新之謂盛德，生生之謂易，成象之謂乾，效法之謂
坤，極數知來之謂占，通變之謂事，陰陽不測之謂神。業本於德而
業顯於外，故先言業，所以日新者，生生故也。故易次於德，乾坤毀
無以見易，故次言乾坤，乾成此象，坤效此法，而因以極生生之數
而知來，故次言占。既知之，即通其變以行之，故次言事。無體之易
本於無方之神，神即在一陰一陽而生生者不可測也，故次言神
而下乃專言易道焉。

夫易廣矣大矣，以言乎遠則不禦，以言乎邇則靜而正，以言乎天地
之間則備矣。夫乾其靜也專，其動也直，是以大生焉。夫坤其靜也翕
其動也闢，是以廣生焉。自邇及遠爲廣，合遠於邇爲大，既廣且大

豈不備乎。乃其所以備者何故也。專直者知之易。惟專故直也。翁
闢者能之簡。惟翁能闢也。直闢卽在專翁之中。因動乃見。施受皆
動之事也。專翁固以靜言。靜而不正。則動有所禦而不能生。直闢
由靜正以出。故生生之廣大莫能禦也。

廣大配天地。變通配四時。陰陽之義配日月。易簡之善配至德。廣
大則易之生生與天地準。故曰配而變通乎天地之間者。陰陽之
氣實有其義。日月運行一寒一暑。又自有分配者。陰陽言道不言
義。無以見易簡之善。善承繼善而言。易簡爲廣大之原。德稱至德。
卽三才之稱極也。此於四象不及失得憂虞者。未涉於事也。

子曰。易其至矣乎。夫易聖人所以崇德而廣業也。知崇禮卑。崇效天。
卑法地。德業在天地。以盛大爲至。德業在聖人。以崇廣爲至。智者
小也。坎得天氣。故崇。禮者火也。離得地氣。故卑。履卑而業由此廣。
物之積者下必廣也。效法皆坤之事。而智禮分言。則以其無形者。

效天以其有迹者法地。要必無無德之嫌也。

天地設位而易行乎其中矣。成性存存道義之門。效天法地效法其位之有崇卑也。所以效法爲有易行其中也。成之者性是曰成性。成之實功在乎存存。易無時不行。故心無時不存。門卽行乎其中心之意。易道生生無心者也。聖學存存有憂者也。

聖人有以見天下之賾而擬諸其形容象其物宜是故謂之象。聖人有以見天下之動而觀其會通以行其典禮繫辭焉以斷其吉凶是故謂之爻。存存之功若何。頤省文作。臣臣者頤也。後言探賾如云探喉而出與隱深遠例矣。賾難於見故惟聖人有之。形容者形之容物宜者物之理會通者觀於事勢盤錯之會而得其通也。典禮者會之所通通以典常之道而當乎禮也。象言易爻言卦彖辭六爻之合爻辭六爻之分。夫子作傳以爻爲象爻又從象以出也。言天下之至賾而不可惡也。言天下之至動而不可亂也。擬之而後

言議之而後動擬議以成其變化。惡者厭也。亂者惑也。隨動必極其至而其不可者乃見。擬者動之事。擬於動而言從之。議者言之事。議於言而動應之。成之功未遑臻於自然。必先之擬議。遠於變化生心則成矣。下七爻示人擬議之則。

鳴鶴在陰其子和之。我有好爵吾與爾靡之。中九二子曰君子居其室出其言善則千里之外應之。況其邇者乎。居其室出其言不善則千里之外違之。況其邇者乎。言出乎身加乎民。行發乎邇見乎遠。言行君子之樞機。樞機之發榮辱之主也。言行君子之所以動天地也可不慎乎。言行至邇動天地至遠而應則榮違則辱。所由動者以是為主。是以須擬議以存存也。善不善屬於言者應違非得自空言自邇及遠。卽言出而行發可知。故言行總爲樞機之發。樞乃門之柱頭。入曰者爾雅樞謂之機是也。機乃弩牙。書若虞機張是也。存道在於慎。故七爻言慎者三焉。而此則七爻之綱領也。

同人先號咷而後笑。九二同人曰：君子之道，或出或處，或默或語。二人同心，其利斷金。同心之言，其臭如蘭。初六藉用白茅，无咎。大過子曰：苟錯諸地而可矣，藉之用茅，何咎之有？慎之至也。夫茅之爲物，薄而用可重也。慎斯術也以往，其无所失矣。臭如蘭者，言之善，藉用茅者，動之善。其利斷金，其往無失，則皆應而不違，榮而無辱者也。心之同，所以明擬用之重，所以明議。

勞謙，君子有終，吉。九三子曰：勞而不伐，有功而不德，厚之至也。語以其功，下人者也。德言盛，禮言恭，謙也者，致恭以存其位者也。亢，龍有悔也。九二子曰：貴而无位，高而无民，賢人在下位而无輔，是以動而有悔也。此承慎斯術而言也。慎則勞不愆，則亢悔者，慎之轉機也。無位對存其位言，無民對萬民服言，無輔對以功下人言。應則有以存其位，違則無以輔其身。曰言曰動，文尤顯然。或以乾上詞同文，言疑爲錯簡，非也。

不出戶庭无咎

初九

子曰亂之所生也則言語以爲階君不密則失

臣臣不密則失身幾事不密則害成是以君子慎密而不出也此

承上慎之無失與不慎之辱而結言之不出戶庭者居其室也蓋

卽古者言之不出之義言加乎民以漸而及故言君臣害伏於隱

亂成於顯階在樞機之外特見遠之始而亂已從內而生故不

曰慎而曰慎密也近儒欲改亂之所生以下爲坤二括囊之文而

以天地變化數句爲釋不出戶庭之義似乎適合然觀卦畫節初

繼以解三節以坎合陰終之兌於內解以坎合陽始之震於外當

非無故未可泥於文詞也

子曰作易者其知盜乎易曰負且乘致寇至解三負也者小人之事

也乘也者君子之器也小人而乘君子之器盜思奪之矣上慢下暴

盜思伐之矣慢藏海盜冶容誨淫易曰負且乘致寇至盜之招也

世之亂盜亂之也欲弭盜必先知盜聖人知晝夜之道以作易卽

知盜在其中矣。致盜由小人之在位耳。其言盜奪盜伐者。蓋上以君子之器予小人。是上慢也。下有奪負奪乘之盜。是下暴也。伐者。伐此慢暴之國。而此伐慢暴之人。乃亦爲盜者。秦爲周之盜。陳項又爲秦之盜。盜盜不同。而其誨與招者。則同也。慢藏冶容。與慎密不出者相反。兩言誨者。出言之不善。至此極矣。乘器之榮。非榮也。奪伐之辱。乃辱也。夫是以不可不慎也。

大衍之數五十。其用四十有九。數不離理。人於擬議。或恐不當。聖人以象辭變占教之。故將言變化之道。而先示以著法焉。衍者。推衍人事之過差。洪範衍忒是也。天地之數五十有五。而大衍之數五十。所以減五之故。漢晉唐宋衆說紛紜。別有詳考。謂多不錄。竊思揲卦用著。史記云。著百莖共一根。五十者。取著之半也。何以取半。著圓而神。圓謂著數七七四十九。用止此耳。故置其一。其一在無用之數。故無所象也。事本顯淺。何用深求。四十九與五十五。各自爲數。猶

之卦數八八與著數七七豈必求所以少數十五之故哉

分而爲二以象兩掛一以象三分者以四十九策分握兩手也掛者取右手手中一策懸於左手指間也象兩象三自來以兩儀三才當之竊觀下言四時及閏則此四象皆當就天時而言一歲之中寒暑往來者兩也寒暑各有上元中元下元卽三也一月之中三五而盈三五而闕者兩也月有三旬卽三也一日之中晝夜者兩也日中當午夜半亦稱午各分三候卽三也然則象兩象三原不必有所指名耳

揲之以四以象四時歸奇於扚以象閏揲之者數之也奇卽所掛之一也扚乃揲四之餘也未揲四先掛一則不可謂一爲餘王制曰祭用數之扚扚同扚正餘剩義也揲四所餘或一或二或三或四合兩手之數得四爲奇得八爲耦由是以掛一之奇歸於所餘之扚而閏法象焉其象何也一歲三百有六旬有六日舉成數耳

日與天會必積至三百六十五日而始周常多五日有零是謂氣盈月與日會月有小盡常少十日有零是謂朔虛置閏之法大約三十三月左右盈虛之數積及二十九日有奇而氣朔分齊再觀中氣所在如前月之中氣在晦後月之中氣在朔其間一月有節無中卽閏月也若歸奇於朮之象閏則以四十八策應乎四十八弦每弦七日半以七五乘四八得三百六十是爲期日歲月之經數而掛一則應五日四分日之一之氣盈也朮策奇四耦八合共十二策以應十二朔爲一歲之實數而掛一則應十日八百二十七分之朔虛也以弦爲七日半之經弦以掛一爲五日有零之盈分必待朮餘之後然後其所歸之一乃得應十日有零之數而爲一歲之實閏故所謂象閏者必合四十八與所餘四八之數乃得之若單舉一揲則或有四無八有八無四旣無以應十二朔而初揲有四十八再揲或四十或四十四三揲或四十或三十六或三

十二又無以應四十八絃矣。

所謂凡四爲奇。凡八爲耦者。初揲非五卽九。必除所掛之一。算之。再揲三揲。所餘止得四八。故張子程子俱謂二三揲不掛。若二三揲亦先掛一。則所餘非三卽七。而所掛之一。旣爲奇。又爲扚。何云歸奇於扚乎。蓋明乎四八之說。則不須再數過揲之策。而奇耦已得。誠爲捷法。然非筮之本旨也。筮法自以過揲所得之四七四八四九四六者爲七八九六之數。若祇看四八。則卽減去其策亦得矣。何必四十九策哉。

五歲再閏。故再扚而後掛。舊以一掛兩揲。兩扚爲五歲。而以再扚象再閏。竊思一閏之後。必經三十三月左右。乃再閏。惟前閏在四月以前者。但間一年。便滿三十三月。於五歲得再閏耳。若前閏在五月以後者。須間二年。方滿三十三月。乃六歲而再閏矣。歷法以十九年七閏。合氣盈朔虛得二百六日有零。而氣分與朔分皆齊。

冬至在十一月朔至朔同日謂之一章茲以一變當一年十八變固未及十九年也而所謂再閏者特以前閏去後閏或間兩年或間三年錯舉五歲之中可見兩閏故以五歲爲斷其言再扞者明後二揲之有扞而無掛也言後掛者明三變成爻之後乃再掛也固非以再扞象再閏亦豈以再扞象不閏之歲哉

天數五地數五五位相得而各有合天數二十有五地數三十凡天地之數五十有五此所以成變化而行鬼神也天數一三五七九地數二四六八十下則言五奇五耦之積數也前言衍數後言策數而此節言天地五十有五數不相符蓋數卽道之所在道則一陰一陽而已故先言五位者數極於五而止也又言相得而各有合者道以變化而神也千變萬化之道只是一陰一陽之道其相得有合之處不可指名故非知神之所爲者不能知變化也

乾之策二百一十有六坤之策百四十有四凡三百有六十當期之

日。此指一變三揲過揲之策也。老陽四九老陰四六總六爻則老陽二百一十六老陰百四十四合之得三百六十焉。少陽四七少陰四八總六爻亦得三百六十而不及者。蒙上變化鬼神而言。故於其變者獨詳也。期者周一歲也。揲四已象四時而乾坤之策又當期之日者。時乃渾言之日。乃析言之所云當者。其數相當而其義各異。蓋正策三百六十則餘策凡二百二十八。張氏浚曰。凡術於算者率以二百二十八為求閏之法。此乃合於七閏一章之數。然則當期之日。猶云當天之度三百有六十。豈直期年之謂與。二篇之策萬有一千五百二十。當萬物之數也。二篇上下經也。陰陽之爻各得百九十二。老陽得六千九百一十二。老陰得四千六百有八。合之得萬有一千五百二十。推之少陽少陰數亦相準。此間終之總數也。凡三十有二月而閏一月。其辰萬有一千五百二十。三十有二年而閏一年。其日萬有一千五百二十。經為此言。詎

惟總核其數已哉

是故四營而成易。營求也。謂求卦也。著數以四爲用。四九四八四七四六。其爲九八七六者有四也。四十八策。其爲四者。凡十有二。而變化之道出焉。易之成爻成卦。必由四營以成也。

十有八變而成卦。八卦而小成。成卦者。成六畫之卦也。重卦六十

有四。何云八卦。蓋謂乾坤坎離震艮巽兌之八卦。非若屯蒙等別立卦名。疑於變通之義有關焉。然其過揲之陽策。凡八百三十六

陰策。凡六百二十四。合共一千四百六十策。應乎日數。八卦四十

八爻。應乎月數。且八卦有百四十四變。其爲十二者。凡十二。又與

期之日相應。故以八卦之成爲小成。若合六十四卦。則有一千一

百五十二變。是亦當萬物之數。乃爲大成耳。上言乾策坤策。專指

重卦之乾坤。故此亦獨舉重卦之乾坤。六子言之。若謂指三畫之

卦。則不應言於十有八變之下也。

以一千四百六十爲應日數者。謂三百六十五者有四也。

引而伸之觸類而長之天下之能事畢矣。此謂由小成之八卦而交錯以及屯蒙等五十六卦引者牽也伸者重也引此及彼而重申之也卦與卦爲類六爻中有互體連體有陰陽往來一卦中包蘊諸卦觸者遇也長者增也由目所觸而增益之也能原於簡能而能悅心能研慮以極於聖人成能故曰能事畢。

顯道神德行是故可與酬酢可與祐神矣子曰知變化之道者其知神之所爲乎。明可酬酢道之顯也幽可祐神德行之神也能事畢者盡人可能簡能由於易知而知非聖人不能故下言聖人之道易有聖人之道四焉以言者尙其辭以動者尙其變以制器者尙其象以卜筮者尙其占何以畢天下之能事以各有所尙也四尙百姓與能而必歸於聖人者百姓不知其所以惟聖者知之而易由此作尙辭尙變卽所以擬議也制器尙象如下文立成器及十三卦取象是也。

是以君子將有爲也。將有行也。問焉而以言。其受命也如響。无有遠近幽深。遂知來物。非天下之至精。其孰能與於此。問者以著問易。言者告著之詞。言卽命也。受者著受君子之命。如響之應聲。謂不爽也。物卽事也。此君子之事。而至精至變至神。則仍歸美於作易之聖人也。

參伍以變。錯綜其數。通其變。遂成天地之文。極其數。遂定天下之象。非天下之至變。其孰能與於此。一二爲參。奇一耦二也。三二爲伍。參天兩地也。變則陽變陰。陰變陽而已。分以見錯。合以見綜。分合因變而著。所貴有以通之。其理至微。而其迹至顯。後儒創立錯卦綜卦之名。求深而反淺矣。文者。雷風水火山澤也。象者。屯蒙需訟等也。極者。由八卦極於六十四。由六十四極於四千九十六也。文成象定。而歸於至變變化之道。在能通也。

易无思也。无爲也。寂然不動。感而遂通天下之故。非天下之至神。其

孰能與於此。君子有爲有行。而文自成。象自定。易固無思。無爲而寂然也。問焉以言。則動而有感矣。天下之故。乃來物也。通者。通其變。是乃神之所爲也。

夫易聖人所以極深而研幾也。唯深也。故能通天下之志。唯幾也。故能成天下之務。唯神也。故不疾而速。不行而至。子曰。易有聖人之道四焉者。此之謂也。天一。地二。天三。地四。天五。地六。天七。地八。天九。地十。遠近幽深。近一而遠幽深三。故總謂之深。通變極數。中有幾焉。通志者。通變也。成務者。成變化也。不行而至者。行鬼神也。歷言天下。以見四尚。單天下之能事。而非天下之至神不能也。前言天數五。地數五。此則又析言之。所以結言一陰一陽之義。

子曰。夫易何爲者也。夫易開物成務。冒天下之道。如斯而已者也。是故聖人以通天下之志。以定天下之業。以斷天下之疑。知來物而謂之開者。志之通。以開其塞而通也。務乃無定之名。務成爲業。成

則定矣。志與務無非天下之道。如斯而已。斯指一陰一陽。非少辭也。斷疑又志業之所以通而定也。

是故著之德圓而神。卦之德方以知。六爻之義易以貢。聖人以此洗心。退藏於密。吉凶與民同患。神以知來。知以藏往。其孰能與於此哉。古之聰明睿知神武而不殺者夫。

著用七七。天數也。冒道故神。卦用八八。地數也。斷疑故智。著陽卦陰。故言德。爻則陰陽不測。故言義。貢者。義從變易以見也。以此者。以此德義也。聖人之心常明。有若洗者。存存之學。其進不顯。是謂退藏。密卽前言慎密。謂無有間斷也。吉凶皆曰患者。易作於憂患。以萬物之患爲身患。是與民同也。著以知來。卦以藏往。此與說卦傳數往者順。知來者逆之義。互相發明。孰能與此。乃起下句之辭。睿智之智。神武之神。卽方智圓神之在人者。神又言武。斷疑主於勇決也。殺同等殺之殺。不殺卽上文精變神之極其至也。

是以明於天之道而察於民之故。是興神物以前民用。聖人以此齊戒。以神明其德夫。知變化之道。以明而知。通天下之故。由察而通。善非能自神。有知神之所爲者。用之。而物亦遂成神物。是聖人以設卦繫辭者。興之也。前者。先民而用。而民皆知防患也。洗在心。曰齋。同在也。曰戒。著卦之德。在聖人卽爲其德。德本神武聰明。而聖人更以齋戒者。神明之也。

是故闔戶謂之坤。闢戶謂之乾。一闔一闢謂之變。往來不窮謂之通。見乃謂之象。形乃謂之器。制而用之謂之法。利用出入。民咸用之謂之神。以戶喻者。爲往來出入言也。先闔後闢。由靜而動也。象。概括指其顯現者。有形則可用爲器。用始於制。極於利。而斯民日用不離。法其迹而神其道也。各言謂之。就聖人之明察言也。

是故易有太極。是生兩儀。兩儀生四象。四象生八卦。八卦定吉凶。吉凶生大業。戶未闔闢。是爲太極。凡陽皆乾。凡陰皆坤。兩儀也。所得

三畫之乾坤。又以坤畫升於乾之中爲離。以乾畫降於坤之中爲坎。十二畫分位乎上下左右者四象也。乾坤坎離之十二畫。卽爲巽兌震艮之十二畫。是八卦由四象以出也。有圖說在再言八卦。謂重卦總此八卦也。上言神明其德日新之德也。此言大業富有之業也。必言凶者。凡業之成。未有但知吉而不知凶者。是吉凶皆業所由生也。

是故法象莫大乎天地。變通莫大乎四時。縣象著明莫大乎日月。崇高莫大乎富貴。備物制用立成器以爲天下利。莫大乎聖人。探賾索隱。鈎深致遠。以定天下之吉凶。成天下之亹亹者。莫大乎蓍龜。承上大業言。故俱曰大。其文則與國關八句。兩兩相應。日月者象也。器由聖人而立。而非富貴者不敢立。此言法也。利用出入。是謂亹亹。不巳之意也。此言神也。賾與深相類。隱與遠相因。聖人立是成器。而天下必探索鈎致以求之。然後吉凶定而亹亹成焉。觀此可

知學易之無取忘象矣。

是故天生神物。聖人則之。天地變化。聖人效之。天垂象。見吉凶。聖人象之。河出圖。洛出書。聖人則之。承上著龜言效之。效四時也。象之。象日月也。圖書與神物皆曰則之。是特因著龜而及圖書。其不以圖書列神物之前。聖言固顯然矣。易稱河洛。僅見於此。程子曰。果無河圖洛書。八卦亦須作。至哉言乎。

易有四象。所以示也。繫辭焉。所以告也。定之以吉凶。所以斷也。四象。卽傳首失得憂虞進退晝夜之四象也。又衍數象。兩象三象四時象。閏亦四象也。此皆明著其辭。似不必以陰陽太少爲解。上言四象生八卦。乃四象在八卦之前者。此言四象。乃四象在八卦之後者。蓋卽傳首設卦觀象繫辭焉。而明吉凶之謂。故首引大有上九爻辭。下文更釋其義也。

易曰。自天祐之。吉无不利。子曰。祐者助也。天之所助者順也。人之所

助者信也。履信思乎順，又以尚賢也。是以自天祐之，吉无不利也。

此釋傳首引易之辭，以終傳上篇之義。又言天祐，傳兼人言者。於人助見天助也。祐之者，祐五也。上信以發志，故爲信。柔得大中，爲順，得位爲履，離明爲思。上在天道，爲五所尚，特言又者，明卦義至上乃顯也。上篇至此已終，其下則總括全文而誅歎之耳。

子曰：書不盡言，言不盡意。然則聖人之意，其不可見乎？子曰：聖人立象以盡意，設卦以盡情僞，繫辭焉以盡其言，變而通之以盡利，鼓之舞之以盡神。象者，八卦之本象，卦指六十四卦，設則因重之謂也。旣曰不盡言，不盡意，又曰盡意盡言，蓋辭本於意，意出於象，聖人所立所繫，乃一卦之象辭，而人事之千變萬化，無所不該，是不盡而盡也。道非變無以通，變而不通，何取乎變？利卽出入之利也。鼓於內而舞於外，鼓動非神不能，人不能知神之所爲，是以聖人之意不可見也。

乾坤其易之緼耶。乾坤成列而易立乎其中矣。乾坤毀則无以見易。易不可見則乾坤或幾乎息矣。緼者衣中之絮。人知易作於乾坤之中而不知乾坤乃在易之中。乾坤終古無毀則易終無不可見之理。人不能見易者非乾坤之毀而人自息之也。故人當學易以求見聖人之意也。

是故形而上者謂之道。形而下者謂之器。化而裁之謂之變。推而行之謂之通。舉而措之天下之民謂之事業。上下曰形。道不離器也。陰陽不測者道也。卦爻有象者器也。八卦化爲六十四卦因而裁制之。又推是變而運行之。又舉是通而措置之。所謂能事大業皆卽是道是器也。此以易之可見者示人也。

是故夫象聖人有以見天下之賾而擬諸其形容象其物宜是故謂之象。聖人有以見天下之動而觀其會通以行其典禮繫辭焉以斷其吉凶是故謂之爻。重述前文而冠以夫象意盡於象聖人有以

見而更繫之辭。希聖者可不因象爻以求見哉。

極天下之蹟者存乎卦。鼓天下之動者存乎辭。化而裁之存乎變。推而行之存乎通。神而明之存乎其人。默而成之不言而信存乎德行。上言謂之者。易示人以可見也。此言存乎者。人之求見易者在此也。易道原於易簡。立於乾坤。神於變化。而聖人之辭皆有以明之。聖人盡其言。學者惟當不言而信。乃能見不可見之意也。神明卽知神之謂。默成卽成性之謂。存其人之德行。卽顯道神德行也。蓋始終以德業勉賢人也。

繫辭傳下

八卦成列。象在其中矣。因而重之。爻在其中矣。剛柔相推。變在其中矣。繫辭焉而命之動在其中矣。上篇曰。謂之象爻。變明其義也。下篇曰。象爻變在其中。推其原也。未列三畫。則無以得天地雷風水火山澤之形。是象在卦成之中也。未備六畫。則又無中爻互爻應。

爻及往來之義。是爻在因重之中也。未分剛柔。則無陽變陰。陰變陽之用。是變在相推之中也。繫辭曰。命者。辭本虛擬以待動。且卦爻之動無常。辭但舉其一端。至於動而自一爻至六爻。觀象觀爻者。其鼓動效動。有非辭之所能盡。然不可謂非聖人之命之也。吉凶悔吝者。生乎動者也。剛柔者。立本者也。變通者。趨時者也。吉凶者。貞勝者也。天地之道。貞觀者也。日月之道。貞明者也。天下之動。貞夫一者也。承上動在其中而言。成列爲相推之本。故曰立本不變通。無以合乎時中。故曰趨時。凡動者。或宜吉而凶。或宜凶而吉。然而惠廸吉。從逆凶。乃正理也。吉凶無常。而理有常。則貞者勝矣。推之天地。只是觀人有所憾無害也。日月只是明晦蝕無傷也。無二道之謂一。象至一而氣蒙之。非正象也。數至一而事亂之。非正數也。動貞夫一。是以易簡也。

夫乾確然示人易矣。夫坤隤然示人簡矣。爻也者。效此者也。象也者。

像此者也。爻象動乎內，吉凶見乎外，功業見乎變。聖人之備見乎辭，確如石之堅，不二故易。隕如土之委，不分故簡。示人者，觀也。明不待言矣。效此像此，謂易簡也。象言內，易道在內也。占言外，人事在外也。功者，事之功。因變而著情者，與民同患有情焉。上篇言性，下篇言情，情以動而見也。

天地之大德曰生，聖人之大寶曰位。何以守位曰仁，何以聚人曰財。理財正辭，禁民爲非曰義。同患之情，生之德，仁之道也。非位，天位者，無以制器尙象，故曰大寶。不仁，則位不能守。非財，則人不能聚。財爲人所同欲，而無以理之，則有上失正而下爲非者。正辭，則無言不順者矣。禁非，則有杜於先者矣。是義又爲仁之條理也。下三卦皆體仁和義之事。

古者包犧氏之王天下也，仰則觀象於天，俯則觀法於地，觀鳥獸之文，與地之宜，近取諸身，遠取諸物，於是始作八卦，以通神明之德，以

類萬物之情。包犧有卦無辭，而辭因卦繫，故特溯其始於包犧。王天下，明大寶也。再言觀者，天地以其貞觀者示人，而人不能效而象之。惟大聖知所取也。鳥獸之文，陸氏續以爲朱鳥白虎蒼龍玄武，四方二十八宿經緯之文，示人以象也。宜者，五土各有所宜，法則由此出也。近如乾首坤腹，遠如乾馬坤牛，八卦作而六十四卦因之，神明其德，所以通也。以盡情僞，所以類也。

作結繩而爲網罟，以佃以漁，蓋取諸離。三三互巽爲繩，互兌附決繩之結也。兩離重目，詩言雉離于羅，鴻則離之，離有離義，網罟象也。巽木兌澤，陸佃而水漁也。蓋者疑辭，張子以爲夫子之言也。

包犧氏沒，神農氏作，斲木爲耜，揉木爲耒，耨之利以教天下，蓋取諸益。三三沒謂道衰，作爲教起，非直兩聖相承也。觀後黃帝之後，有少昊顓頊帝舜，乃及堯舜，則義農之非世及明矣。耜耒首也，耒耜柄也，巽爲木，斲者直之，操者撓之，巽工所爲也。坤田震稼爲利。

震一陽自地下而動，巽二陽自地上而進退，益民莫大於耒耨之利，巽命所以教也。益來自否，凡卦所自來有乾象者，俱稱天下若噬嗑，渙隨睽皆然。

日中爲市，致天下之民，聚天下之貨，交易而退，各得其所。蓋取諸噬嗑。三三，日出於震而在上，日之中也。否坤爲民，艮山坎水，百貨所出而聚於震之大塗，市象也。四爲頤中之物，同於豫之盍簪，故有聚義。坤初乾五往來交易也。日中必昃，斯退矣。離陰自巽爻而往，巽有退象，離得中於外，震爲主於內，各得其所也。市以貨易而得所，猶噬以嗑而亨耳。

神農氏沒，黃帝堯舜氏作，通其變，便民不倦，神而化之，使民宜之。易窮則變，變則通，通則久，是以自天祐之，吉无不利。黃帝堯舜垂衣裳而天下治，蓋取諸乾坤。三三三三三三，時至黃帝堯舜而文章煥焉，禮樂法度由質趨文，燦於外者，陽之變也；運於內者，陰之化也。變欲

求通強以守舊則倦心生而變不合義亦失其宜故使民由之之謂通不可使知之之謂神陽窮於九陰窮於六用九用六所以通也以久而窮以通而久乃易道也復引大有爻辭者易原易簡以生變化上下篇無二旨焉文莫著於作會作服於乾坤兼取者易之門易之緼也衣裳俱言垂者天包乎地有爲而後無爲也書曰予欲觀古人之象象之說始此矣

剝木爲舟剝木爲楫舟楫之利以濟不通致遠以利天下蓋取諸渙
三三 剝者虛其中中爻互頤以載也剝者創其本初陰連震以動也坎加離位有剝剝之用巽加坎位有乘木涉川之功否象不通易渙則濟而通且近濟而遠亦可致風行水上舟楫之利也

服牛乘馬引重致遠以利天下蓋取諸隨三三 引重牛爲多震本否坤坤爲牛也致遠馬爲多兌本否乾乾爲馬也中二陰互艮鼻所以服牛中二陽互巽繩所以乘馬震一陽在下重也兌附決以

引之兌一陰在外遠也震健動以致之古之牛馬皆以駕車無以騎爲服乘者艮手巽繩皆車內之人所御在於中爻入位而牛馬隨之以行止也

重門擊柝以待暴客蓋取諸豫三三三艮爲門四來自剝艮而震又互艮門之重者也震爲有聲之木艮手執之乃柝象坎木多心艮木多節震動象以木擊木坎寇震般在人位爲暴客雷之出地不必皆有所擊待乃豫待之義也

斷木爲杵掘地爲臼曰杵之利萬民以濟蓋取諸小過三三三互巽爲木兌毀折之斷木也艮震皆坤體艮手持木而巽入於地掘地也木動於上杵也石止於下臼也艮石承震稼而巽入兌現以治之曰杵之利也動於兌口以巽入而止於內所以濟也食不厭精七糲九粢小過之義也

弦木爲弧剡木爲矢弧矢之利以威天下蓋取諸睽三三三坎木堅

離結繩以弦之。離木槁。兌毀折以剡之。坎弓爲弧。離兵爲矢。離又互離。矢加於弓而兌金現於外。弧矢之利也。火澤之動爲人所畏。故曰威。弧矢惟恐不傷人以乖異爲利者也。

上古穴居而野處。後世聖人易之以宮室。上棟下宇以待風雨。蓋取諸大壯。三三。三古以包犧爲上古。而此言上古。則有在包犧前者。如穴居野處。當自生人以來卽然矣。穴居野處。遯象也。三三艮在下。象穴。乾在外。象野。同人於野可證也。遯反易則爲大壯。乾三陽震坎艮皆爲木。木架構於內而現於大塗。用水則非穴居矣。在塗則非野處矣。外圍繞曰宮。中充實曰室。震起於上。上棟也。乾覆於下。下宇也。卦無巽風。坎雨待之而已。遯中互巽而外卦伏坎。固不能避風雨之患矣。穴居亦欲其壯固而不若宮室之大者壯也。宮室棺槨書契三者。獨以易之言。虞氏翻謂取上下易象。大壯易无妄也。大過易中孚也。夬易履也。竊思反卦之義。發自文王繫辭。

傳爲辭而作。宜以反。易爲義。易官室者。遷易大壯也。易書契者。姬
易。夫也。惟大過之反。仍爲大過。而傳於易。以棺槨之下。卽云取諸
大過。更無他辭。蓋衣薪用以葬也。棺槨亦用以葬也。豈若官室之
於風雨。書契之於官民也哉。

古之葬者。厚衣之以薪。葬之中野。不封不樹。喪期無數。後世聖人易
之以棺槨。蓋取諸大過。三三 四陽爲人在中。二陰爲土在外。死者
以土爲安。入而後悅。葬之義也。古之葬。亦是取諸大過。特時未通
變。初非以薄爲道也。巽木爲薪。兌附爲衣。兌倒巽上下。皆薪爲厚。
中野。猶云野中。需之初。同人之上。皆曰郊。坤上曰野。是也。封乃積
土。二陰上下相離。不封矣。樹乃標樹。巽木伏於剛。剛之地。不樹矣。
中爻伏坎。月離日。非不居喪也。其象不顯。故其期無數耳。卦似無
所易。而亦言易者。蓋反兌之附。決者於下。有附身附棺之義焉。反
巽之爲工。爲繩。爲長。爲高者。於上有斷。薪成器而加封。樹之象焉。

周尸爲棺。周棺爲槨。乾請陽皆木。棺槨於文從木。正義疑檀弓有虞氏瓦棺。古棺未必用木者。非也。檀弓又有柩棺梓棺。喪大記有松槨栢槨。雜木槨。後漢書趙咨傳云。陶唐虞夏或瓦或木。則瓦棺初非定制。猶之官室之世。何必無穴居之民乎。冢人墓大夫。周禮不以設官爲過。豈得以後世厚終之敝同譏哉。

穴居結繩。皆稱上古。而葬但稱古者。結繩用於佃漁。是未佃漁時。必先有結繩。非結繩亦始作於包犧也。穴居野處。所由來更不可考矣。孟子云。上世嘗有不葬其親者。葬則已。非上古故云。古之葬者。至如路史所載。有巢氏之巢。居結繩。几蘧氏之橐。昇風化。鑒指其時。類出諸子。未足取信也。

上古結繩而治。後世聖人易之以書契。百官以治。萬民以察。蓋取諸夬。三三結繩而治。姤象也。三三姤。巽繩直。坤再索以結之。反姤爲夬。而象書契者。古無筆墨。或點漆磨石以爲書。或以刀刻木而中。

分爲契。乾陽皆木。兌澤濡汁而染於上。書之象也。乾金以刻之。兌折以分之。契之象也。兌由乾出。脩辭立誠。陽長於內。爲百官。陰極於外。爲萬民。乾兌備始終之義。爲治與眼。外視爲察。義皆取諸明決也。十三卦首言包犧易之始也。終言書契其以明繫辭歟。

是故易者。象也。象也者。像也。象者。材也。爻也者。效天下之動者也。是故吉凶生而悔吝著也。上言取諸者。錯舉其象以示人。其實易之義。不外乎象之一言。故春秋傳直曰易象。象之爲言。像而已。象備三才。材則成材。適用之義。效亦像也。象像於靜。爻像於動。吉凶顯而悔吝微。故曰著此結上取象十三卦而起下效動十一爻也。

陽卦多陰。陰卦多陽。其故何也。陽卦奇。陰卦耦。其德行何也。陽一君而二民。君子之道也。陰二君而一民。小人之道也。陽畫一。陰畫二。

震坎艮一陽二陰。巽離兌一陰二陽。五畫爲奇。四畫爲耦。君者主也。陽卦以陽畫之一爲主。陰卦以陰畫之二爲主。陽君子而陰小

人也。道貴貞夫一不一則貳矣。

易曰：「憧憧往來，朋從爾思。」咸九三子曰：「天下何思何慮？天下同歸而殊途，一致而百慮。天下何思何慮？日往則月來，月往則日來，日月相推而明生焉。寒往則暑來，暑往則寒來，寒暑相推而歲成焉。往者屈也，來者信也，屈信相感而利生焉。尺蠖之屈，以求信也；龍蛇之蟄，以存身也。精義入神，以致用也；利用安身，以崇德也。過此以往，未之或知也。窮神知化，德之盛也。」首言「一致歸於致一」而終以「立心之恒」。此承上「主一」而言也。兩言「何思何慮」者，凡生乎動者，皆自不動以出，是本同而一者也。易於文，象日月，故言日月，因日月及寒暑，一剛一柔之相推也。往來如日月寒暑之有定，乃非憧憧往來有屈信之象，而屈又爲信之基，反於身求於德，德之崇無來可言，但觀其過此以往耳。身以存而安，用以致而利，入於神，乃能窮乎神，知神之所爲，以知變化而實未之或知，則仍何思何慮而已。所謂同歸也。

尺蠖龍蛇皆能變化而屈又不如蟄故以龍蛇喻身之德良兌皆小於物爲蟲龍象互乾蛇屬巳互巽之位也

易曰困于石據于蒺藜入于其宮不見其妻凶困六三子曰非所困而困焉名必辱非所據而據焉身必危既辱且危死期將至妻其可得見耶困無形而據有迹故困言名據言身非所者困而失其所也上四爻互大過死象坎離爲期辱且危與利用安身相反是乃憧憧而不知一者也

易曰公用射隼于高墉之上獲之无不利解六三子曰隼者禽也弓矢者器也射之者人也君子藏器於身待時而動何不利之有動而不括是以出而有獲語成器而動者也上處卦外弓矢象皆在內故爲藏器不括乃夙吉之義成器則成德之象也身卽安身之身利卽利用之利此崇德之君子也

子曰小人不恥不仁不畏不義不見利不勸不威不懲小懲而大誡

此小人之福也。易曰：履校滅趾，无咎。履校滅趾，此之謂也。善不積，不足以成名。惡不積，不足以滅身。小人以小善爲无益而弗爲也，以小惡爲无傷而弗去也。故惡積而不可掩，罪大而不可解。易曰：何校滅耳，凶。
上九 不耻矣，而利猶可以勸之，不畏矣，而威猶可以懲之，則惡不至，積罪不至大，故懲誠卽以致福。若由不耻不畏，而直謂無益無傷，則有不可揀棄者，此名辱身危之小人也。

子曰：危者，安其位者也；亡者，保其存者也；亂者，有其治者也。是故君子安而不忘危，存而不忘亡，治而不忘亂，是以身安而國家可保也。易曰：其亡其亡，繫于苞桑。杏九五 身安由於安身，能保國家者，安而不危，君子也。

子曰：德薄而位尊，知小而謀大，力小而任重，鮮不及矣。易曰：鼎折足，覆公餗，其形渥，凶。鼎四 言不勝其任也。德薄反乎崇德，不勝其任者，危而不安，小人也。

子曰：知幾其神乎？君子上交不諂，下交不瀆，其知幾乎？幾者，動之微，吉之先見者也。君子見幾而作，不俟終日。易曰：「介于石，不終日，貞吉。」豫二：「介如石焉。」寧用終日，斷可識矣。君子知微知彰，知柔知剛，萬夫之望。子曰：「顏氏之子，其殆庶幾乎？有不善，未嘗不知；知之，未嘗復行也。」易曰：「不遠復，无祇悔，元吉。」復初九 上下交，乃身之所接；而神則承上入神，窮神而言神，何謂乎？則知幾其神乎？幾者，動而未形，有無之間。此本孔氏正義之語。幾之義，於微與柔相近。彰剛則致於用者，言上下交已寓上下易象。豫易上下則爲復。知幾者，自誠明庶幾者，自明誠。謂庶可進於知幾也。有不善，微矣；而知之，則彰。知不善，柔矣；而禁行則剛。无祇悔者，吉之見於先也。未嘗復行者，不俟終日之斷也。於豫而三稱君子，已見脩德之全。於復特舉顏氏之子，繼孔子而爲萬夫之望，非其人莫屬矣。

天地絪縕，萬物化醇；男女構精，萬物化生。易曰：「二人行則損，一人一

人行則得其友。損三言致一也。萬物皆天地所生。而其生不可指名。故曰醇。構卽綱組之義。精則其所以化也。損由下以益上。綱組之氣亦皆自下。蓋凡肇端夫婦而察乎天地者。無非感於至一之氣。故曰致一。以終首言一致之義也。

子曰。君子安其身而後動。易其心而後語。定其交而後求。君子脩此三者。故全也。危以動。則民不與也。懼以語。則民不應也。无交而求。則民不與也。莫之與。則傷之者至矣。易曰。莫益之。或擊之。立心勿恆。凶。益九身之安。由於心之易。何思何慮。以待時也。安在已。交在人。上交下交而得友也。與者應之實。動而不與。則無交可言。安望求之能與乎。傷至則不止於危矣。故其要總在立心之恆。恆爲益之上。下易卦而卽咸之反卦。十一爻始於咸。終於恒。曰與曰應。二卦之義也。感於二而久於一也。

子。坤乾坤其易之門耶。乾陽物也。坤陰物也。陰陽合德而剛柔有體。

以體天地之撰以通神明之德其稱名也雜而不越於稽其類其衰世之意耶

上篇曰易之緼性主藏密也下篇曰易之門情主發現也乾闢坤闢兩戶合而稱門爻有等曰物撰承體言凡有體者皆天地之所爲撰設其在物之理乃德也名卽字也古曰名今日字不越者不外一陰一陽畫卦但有卦名而意未顯至繫辭以盡其言則因相攻相取相感而有其類辭所以濟民行之貳豈其上世之民已貳哉故曰衰世之意也

夫易彰往而察來而微顯闡幽開而當名辨物正言斷辭則備矣其稱名也小其取類也大其旨遠其辭文其言曲而中其事肆而隱因貳以濟民行以明失得之報易之興也其於中古乎作易者其有憂患乎往者嘗顯彰之正以微之來者常幽察之乃能闡之開者包犧之卦得文王周公之辭而開通其義蘊也名在卦開乃知其名

之當物在爻。開乃得其物之辨。象惟一端故小。占盡萬變故大。肆對曲言。謂直也。辭中乎遠之旨。旨隱乎文之辭。皆以正理斷之也。理貞夫一。而民貳之。貳則有失得之報。而易道以與。易書以作。由中古視上古。則商周間已爲衰世。夏卽同憂之憂。患卽同患之患。所憂患者。德之不脩。故下陳九卦。取其全者而析言之也。

是故履三三德之基也。謙三三德之柄也。復三三德之本也。恒三三德之固也。損三三德之脩也。益三三德之裕也。困三三德之辨也。井三三德之地也。巽三三德之制也。九卦先後一循上下經之次。而九卦中又以恆爲主。恆乃貞勝者也。其前履與謙。取諸對卦而復則十二辟卦之列於首者也。其後損與益。困與井。取諸反卦而巽則入純卦之序於終者也。曰基曰柄。本得其貞幹而事乃可久也。曰脩曰裕曰辨曰地曰制。利其推行而久乃不變也。恆合震巽是皆陰陽之始交。而九卦始兌。其中得巽者五。得震者三。得兌者

亦三乾坤俱在前坎獨在後而以重巽終惟於離無取蓋離得坤中不習無不利此尙崇德義不及離也然履居首困井巽居末惟此四卦中有互離則猶是大明終始之道耳於六十四卦而摘其九所餘天地五十有五之數人成能於天地之中也

履和而至謙尊而光復小而辨於物恆雜而不厭損先難而後易益長裕而不設困窮而通井居其所而遷巽稱而隱辨於物者不蔽於物欲也不設者不預設止境也巽順於理爲稱入於微故隱也此舉各卦之體由內及外卽前言九德而或更進一義以深之或舉其相反以明之也

履以和行謙以制禮復以自知恆以一德損以遠害益以興利困以寡怨井以辨義巽以行權困不失所故無怨巽入理深故能權也井井各地其辨不待言矣有遷則恐不盡合義故曰辨此又以濟困之辨於窮與巽之制於隱耳因上言卦體遂及卦用以者以此

卦也。猶大象言君子以先王以也。是皆觀象下文則言觀爻。

易之爲書也。不可遠爲道也。屢遷變動不居。周流六虛。上下无常。剛柔相易。不可爲典要。唯變所適。其出入以度。外內使知懼。又明於憂患與故。无有師保。如臨父母。初率其辭而揆其方。既有典常。苟非其人。道不虛行。不可遠爲道也。六字爲一句。蓋情以近而不相得。比應往來。求於遠者。本於近也。屢遷變動不居者。動則觀變。不徒觀象於居也。六爻曰。六虛卦未成。猶虛以待也。典要謂守常而得其要。辭示吉凶。又當自審所事故曰。不可爲典要。出外入內皆有法度。不敢妄爲。知度則自知懼矣。憂患與故者。明憂患而并明所以致憂患之故。是由師保之敬。而見父母之愛也。率辭者。行其言也。揆方者。慎所往也。然或初欲行而終不能行。則以非脩德之人故也。凡此皆言爻也。而勉以一德。則與九卦之言卦無二義矣。易之爲書也。原始要終。以爲質也。六爻相雜。唯其時物也。其初難知。

其上易知本末也。初辭擬之，卒成之終。若夫雜物撰德，辨是非，則非其中爻不備。噫，亦要存亡吉凶，則居可知矣。知者觀其彖辭，則思過半矣。此以六爻析言之，質對文而言。相雜則有文矣。本末以知言，故先言初上，後言九六。本末非可言雜，所謂雜者，乾坤之物，天地之撰，剛柔之德，三者之是非，皆於中四爻辨之。辨故先言九六，後言二三四五也。亦要云者，卽要終之要，謂求也。六爻中必有一爻爲卦主者，其辭多同於彖辭。居已可知，不待動而後知。人患不思耳。過半，蓋不止於得半也。是觀爻仍是觀彖也。

二與四同功而異位，其善不同。二多譽，四多懼，近也。柔之爲道，不利遠者，其要无咎，其用柔中也。二四三五，內外別體，而以與言者，此指互卦。非指本卦之二四三五也。中爻二至四，三至五，又互成六爻之卦，則本卦之二已作初爻，本卦之五已作上爻矣。惟本卦之三爲互卦之二，又卽爲互卦之四。本卦之四爲互卦之三，又卽爲

互卦之五。此所以云與也。同功。卽與之謂也。善以功言。倘不善。何
以爲功。而有不同者。論其位。有譽與懼之異也。二所以多譽爲其
近也。四所以多懼爲其遠也。畫卦先內後外。內故近。外故遠。觀於
蒙之遠實。姤之遠民。皆爲四言。可知二當爲近矣。二四陰位。故以
柔爲道。致遠在乎剛健。四位大臣。任大責重。苟其媿媿。何利之有
乎。其要无咎。承多懼言。後云懼以終始。其要无咎。與此互相發明。
所懼德不稱位。非懼富貴難保也。其用柔中。承多譽言。二之譽在
中。不在柔。譽非容悅爲事也。傳有柔不利遠之文。而無剛不利近
之文。則知所謂柔者。但空言二四之位已耳。

三與五同功而異位。三多凶。五多功。貴賤之等也。其柔危。其剛勝耶。
三五不云其善不同者。五乃君象。善則歸君。不敢與君比德也。君
貴臣賤。貴賤之等。正與其善不同。句相對。非解釋多凶多功之故
也。不言遠近者。三在遠近之間。五當君位。不可以遠近言也。不言

剛之爲道者。剛者天德。非若柔之以時地論也。柔危。承多凶。言凶非剛位之故。柔者更危也。剛勝承多功。言六五亦是有功而剛者更勝也。傳於柔位。指柔之不利於剛位。又特著其柔危。蓋象傳凡言位不當者。多在三四兩爻。三則皆是六三。此柔危之義也。四則九六皆有之。此多懼之義也。至二則無當不當之文。五則有正當位當之文。此可識多譽多功之義矣。

易之爲書也。廣大悉備。有天道焉。有人道焉。有地道焉。兼三才而兩之。故六六者非他也。三才之道也。道有變動。故曰爻。爻有等。故曰物。物相雜。故曰文。文不當。故吉凶生焉。此應傳首言六爻之動三極之道也。廣者地也。大者天也。悉備者人也。三才各兩者。爻固有兩相交之義也。非雜無以成文。而文中必有其質。前言原始要終以爲質。當不當之謂也。此上觀爻之法也。

易之興也。其當殷之末世。周之盛德邪。當文王與紂之事邪。是故其

辭危危者使平易者使傾其道甚大百物不廢懼以終始其要无咎此之謂易之道也此應上篇所言盛德而特舉殷周時事明傳爲繫辭作也辭以憂患而危欲人知懼已耳知懼則凡事見危不知懼則凡事見易如泰之平陂否之傾否必有道以使之乃能要諸无咎生生之易所以日新而富有也然觀象之无咎者上下經各四卦其六爻皆无咎者萃之外無他卦統觀三百八十四爻无咎者八十有五而已蓋无咎若此之難也能无懼乎能不危乎夫乾天下之至健也德行恆易以知險夫坤天下之至順也德行恆簡以知阻能說諸心能研諸侯之慮定天下之吉凶成天下之亹亹者是故變化云爲吉事有祥象事知器占事知來此應上篇言易簡也險阻承危懼而言凡事無不險於難阻於繁健順之至則險以易而失阻以簡而通自有能先知者其知本諸德行得易簡於心而行易簡於事兩言恆者貞夫一者也知險阻則知懼而能悅

能研象爻之王公傳之后及大人類爲在上者言故稱諸侯下文
乃及百姓也成疊疊猶禮器言君子達疊疊焉蓋明於憂患而黽
勉以行也云者言也爲者事也易以導人於善故事皆吉事有象
事以制器有占事以下筮皆有吉之先見者是所由疊疊也
天地設位聖人成能人謀鬼謀百姓與能盡人之明不能決然後
謀之鬼焉上言諸侯此言百姓必使百姓皆能悅能研乃見聖人
之全能有以克成於天地中也

八卦以象告爻象以情言剛柔雜居而吉凶可見矣變動以利言吉
凶以情遷是故愛惡相攻而吉凶生遠近相取而悔吝生情僞相感
而利害生凡易之情近而不相得則凶或害之悔且吝情對象言
爲聖人之情對利言爲凡人之情而總歸於易之情言卽辭也以
利言者卽有害以情遷者卽有僞由所處之遠近而愛惡出焉古
書之辭凡言吉凶者凶也利害者害也此文意亦偏注故言攻取

感而下遂專言凶害悔吝也。獨舉近者。近則情尤易見也。

將叛者其辭慙。中心疑者其辭枝。吉人之辭寡。躁人之辭多。誣善之人其辭游。失其守者其辭屈。上言情。此言辭。辭出凡人之情。然以凡情而擬諸形容。是卽聖人吉凶悔吝之辭也。六辭分屬六子。虞氏說非無謂。若泛指恒情。卽使傳終無此文。亦無餘義。何爲贅乎。離火附於草木。草木還爲火焚。故象叛中暗。故慙也。坎險爲疑。枝象水支分也。吉取艮止。莊子云。吉祥止止。是也。震乃躁卦。惟止故寡。惟躁故多。兌爲巫。誣之文從巫。爲誣善也。游則壅坎象也。巽進退不果。故失守。屈則退而伏也。不及乾坤者。乾坤之純以六子而雜。然陽皆乾。陰皆坤。六子之險阻。卽乾坤之險阻也。六子先後其次。與文王異。虞氏以慙屬坎。枝屬離。非也。